



元文類卷第十五

奏議

諫幸五臺疏

元貞二年五月上

李元禮

臣聞古人有言曰天下之得失生民之利害社稷之大計惟所見聞而不繫職司者獨宰相得行之諫官得言之今朝廷雖不設諫官監察御史職當言路即諫官也烏可坐視得失而無一言以裨益聖治萬分之一哉伏見五臺初建寺宇土木既興工匠夫役不下數萬人附近數路州縣供億煩重男不暇耕女不暇織百物踊貴則民將有不聊生



者矣又聞太后親臨五臺布施金幣廣資福利其不可行者有五何則時當盛夏禾稼百姓歲計全仰秋成扈從經過千乘萬騎不無蹂躪其不可一也太后春秋已高親勞聖體往復暑途數千里山川險惡不避風日輕一霧露萬一調養失宜悔將無及其不可二也陛下即位以來遵守祖宗成憲正當兢業持盈之日凡上舉動必書簡冊以貽萬世之則書而不法將焉用之其不可三也夫財不天來皆出於民今朝廷費用百倍昔時而又勞民傷財以奉土木其不可四也佛者本

西方聖人以慈悲方便為教不與物競雖窮天下珍玩供養不為喜雖無一物為獻亦不為怒今太后為國家為蒼生崇奉祈福福未獲受而先勞聖體聖天子曠定省之禮軫思親之懷其不可五也伏願中路迴轅端居深宮儉以養德靜以順神上以循先皇后之懿範次以盡聖天子之孝心下以慰元元之望如此則不待祈福而福自至矣臣元禮謬當言路不避僭越而惓惓不已者誠以臣子愛君之心切冀其一悟聖聰與其受不言之責寧獲敢言之罪天下幸甚

建白一十五事

馬祖常

竊惟古者建立言事之官非徒撻拾百官短長照
刷諸司文案蓋亦拾遺補闕振舉綱維上有關於
社稷下有係乎民人禮文風俗治體所存名爵謚
贈政理斯在教化有方則善惡自別設施有法則
緩急自明重穀則農自勤定制則官自守脩武則
先卹兵嚴試則可勸吏事欲究其本末言似涉於
繁蕪統論難悉條析易陳所有建白一十五件逐
一開具如左伏請聞奏施行

一夫惟天子者上承天地下紹祖宗社稷是守

黎庶是戴崇高尊大無與比隆奉養當極其精
美保愛當極其嚴密大而一飲一食小而一嘔
一笑若調攝玉體凝順中和則清明在躬淑善
感應欽覲

皇上仁心如堯儉德如禹伏願重以承天地
祖宗之鴻業於進御之間當以玉食宜乎榮衛
者爲先至於酒醴固是穀麥所釀然更乞於進
御之際命近侍臣隣思一獻百拜之義則天下
生靈不勝幸甚

一郊祀者國之大禮在古所隆欽惟聖上仁慈

元文卷十五
三
孝敬度越百王伏願今後郊祀之日大駕親有
事於南郊親裸于太室則天地答貺神明降禧
薄海內外咸仰聖德太平之福群生幸甚
一大內正衙古之帝王朝百官之地今大明殿
是也觀闕盤鬱城雉繚環祖宗之所御黎庶之
所瞻今聖主謙德彌恭尚居東宮之舊竊慮民
物觀聽有所未喻伏願賜御大明正衙鎮服華
夏統體天地何以言之譬日月星辰順居次舍
則萬物被光群生仰明

一百官朝見奏事古有朝儀今國家有天下可

年典章文物悉宜粲然光于前代况欽遇
文明之主如科舉取士吏員降等之類屢復古
制惟朝儀之典不講而行使後世無所鑒觀則
於國家太平禮樂之盛實爲闕遺且夫群臣奏
對之際御史執簡史官執筆縉紳珮玉儼然左
右則雖有懷姦利乞官賞者亦不敢公出諸口
如蒙聞奏命中書省會集文翰衙門官員究講
參酌古今之宜或三日二日一常朝則治道昭
明生民之福也

一古之爲治蓋有禮樂非徒事刑法之末也夫

有道之世措置施設悉存禮樂之義欽惟
聖上君德昭然孝慈純備嚮居潛邸招致天下
儒學之臣延納海內知名之士禮樂文物洽乎
聖性故踐位以來進儒術而抑吏道却珍禽而
絕游畎清心寡欲民物豐阜其用儒之效固已
驗矣獨未聞今皇儲左右天下儒學之臣有幾
海內知名之士有幾也伏願憲臺聞奏乞賜依
準治古之法命朝臣集議典制請行皇太子視
學齒胄之禮明示天下教化之本雖道德之躬
仁孝溫文固已篤至然聞見習熟又在薰陶此

實係國家萬世之福卑職先上疏特請選擇師
傅左右之人至今未蒙施行然區區之情實念
及此不勝切至之甚
一中書省樞密院御史臺三府掾史雖職掌文
書亦日佐大臣決理政務伏請聞奏設立律學
筭學博士命隨朝二品三品正流衙門吏人欲
求轉補三府掾史者就其所業於律學筭學博
士之前應試依科舉差監察御史監試吏禮部
官知舉每一周歲試舉一次則三府有得人之
實下無躁進營求之私試中之人不必限以出

身之高下不中者發下本後考滿不得過從七
品仍預照會施行則立賢無方公道不偏
一諸道宣慰司除吐蕃南詔兩廣福建外如淮
東浙東荆南山東四道並爲無用徒月費俸廩
坐養官吏而已如依準前代制就令一道重鎮
路分總管達魯花赤帶受本道宣慰使等職名
鈐轄數路上不煩朝廷虛設職官人吏下不使
數路官府牽制煩複無益於事

一諸翼軍官自萬戶下至百戶子弟承襲父兄
之職者合參酌古今之宜設立武舉並須習學

兵法武藝如蒙古色目人只試以武藝如願試
兵法中者陞階漢人兼試兵法武藝中式者方
許承襲如布衣之士願試及中者於各翼或不
叙或戶絕等歇空相應名闕內擢用如此庶使武
備不弛軍政稍嚴保大定功之事爲體不輕必
若今日難於更張則四方宣力老將旣已病死
承襲驕脆子弟但知酒色裘馬爲華好一旦直
欲冒矢石執干戈以犯勍敵不惟本人自取肝
腦塗地從軍將吏死復何辜卑職歷觀前古之
迹其禍患弊病未有不生於太平之世竊慮及

此伏乞施行
一司徒司空皆古三公之流入臣名爵無極此位比者聖上踐祚之初沙汰冗濫尤慎此官近歲屢有雜人等如沈宗攝汪元昌輩亦受司空司徒切慮天下後世傳爲口實非便
一親民之官守令爲急然守令者緣係朝廷遷除之人才或不良心亦知惧而行省所差府州司縣提控案牘都吏目典史之徒徃徃恃其名役之細微縱其姦猾舞文弄法操制官長傾詐庶民蓋此徒出自貼書小吏數十年間轉充是

後卑職頃居田畝嘗聞此等言曰我等身無品級子無廕叙原此初心謂之無賴而令竊弄府州司縣之權剝刻單弱以肥其孥良可憫嘆如蒙聞奏命中書省除各路存留官經歷知事照廢外其餘革去請參酌古制今各州判官僉書州事各縣主簿勾稽本縣文簿實爲官制不紊體統稍均人既有名事自不苟爲係於民不細伏乞施行

一命將守邊國之司命然御將之方當盡其道毫銖一失利害懸絕要先知其艱難勞苦之情

平居使之順其逸樂略其深文密法而不責其
小廉曲謹然後效死也易是爲御將之道夫將
不可不擇也擇而用之勿疑不疑則專專則重
重則可倚倚之而不效則名而殺之無輕名之
理今近歲連召北邊大將似涉輕易古語云臨
敵易將非策也竊慮及此伏乞聞奏施行
一漢軍征戍嶺海之南歲病而死者十率七八
其所屬軍官利在危殆之際必用資財擬指軍
人北方本家所有孳畜田產厚息借貸準折還
納終致破產不敢有詞夫以世襲軍官蠶食部

下行伍深可哀痛今後如蒙將在嶺海及漳汀
等數處征戍軍人果有病患除官爲耆醫外其
貧苦闕用之人比及取發封裝以來宜令本處
有司約量借放封裝到日撥除還官並不收息
或應借貸而不借貸不應借貸而借貸者從本
道廉訪司體察究治如此庶不致中原軍戶日
蹙軍官日富

一侍衛親軍根本所係宜令各衛指揮使立時
教閱練習武藝奮力訓練精銳則萬一應卒得
用仍除鎮衛守把外不令與官員作工蓋造後

使勞苦幸甚

一太常定謚古今美制欲使姦人知懼於死後善人有歡於生前近歲謚號之稱不公殊甚如今後太常定謚不公宜令監察御史糾彈庶使輿情稍伸國典不曠

一農穀天下之本也四民則以農爲次百貨則以穀爲首操布帛之重輕關生民之休戚者穀爲急焉而近年工商淫侈游手衆多驅墾畝之業就市井之末蓋爲政者失勸農之道焉今後乞將各路府州縣達魯花赤專管諸軍與魯總

管知府知州縣尹專勸農事事既歸一功仍可就更講究重穀勸農之方畫一開坐行下有司遵守如民有馬牛驢畜遮相食踐田苗并彼此爭告田土疆界不實等罪名及民間婚姻債負拖欠金銀資財許得以穀贖罪準折輕賚之類果有力田之人縣州勸農官等就於見在錢糧內撥賞束帛豚酒然後開申不實者許廉訪司體察如此旌異慰勞行之數年必有成效

建言五事

許約

伏覩世祖皇帝登極詔書有曰天下大業非一

聖一朝所能廉備也切惟官有未備政有未舉正
賴後聖補之方今天下官職咸備治具畢張其所
以輔成先朝之弘規者多矣然於天朝盛典顧尚
有未暇舉行者約以不才猥當言路切有管見五
事伏冀采擇一曰開經筵所以資聖學也二曰立
諫官所以隆大業也三曰祀勲臣所以勸有功也
四曰定配享所以明道統也五曰廣薦舉所以求
遺逸也縷陳如左合行具呈御史臺聞奏施行
一曰開經筵夫經筵之設將以講明正學培養
君德所謂經筵侍講與今翰林侍講侍讀名同

而實異自漢唐以來人君聽講經史者多矣至
唐穆宗始名韋處厚路隋爲侍讀命講詩書至
宋司馬光程頤嘗充是選此即經筵侍講崇政
殿說書也

世祖皇帝嘗令左丞許衡具六經中有益於政
事者進講 裕皇在東宮時亦嘗令賓客宋術
日講尚書今 聖上崇尚儒雅厲精求治凡可
以興太平者莫不舉行唯經筵之制未能復古
縱有爲之建明者而有司行移翰林令侍講侍
讀就充是職殊不知其職所掌實不同也今莫

若於在廷諸臣中擇其學問正大義理精明者
二負俾爲經筵講讀官於經史中擇有補於世
道時政者進講不必屑屑於章句但舉其大義
質諸政事明天地性命之理古今治亂之原君
子小人之辨學術邪正之分又選近臣二負領
其事伺 聖上清燕爲之引進導達或半月一
講或一月一講仍預令翰林編集 世祖嘉言
聖德與凡政事之弛張賢哲之謀謨人材之進
退財用之出納及命將出師混一區宇遠謀宏
略類爲一書如貞觀政要每遇經筵必先令講

讀一二條次及經史其於治道實非小補
二曰立諫官古者天子有爭臣七人諸侯有爭
臣五人大夫有爭臣三人其職即漢之諫議大
夫與近世左右司諫正言也考之前代并隸中
書省古之賢君不惟善納諫又屢賞諫臣導之
使諫是以能成至治傳有之賞諫臣者國必興
今百司庶府已備獨諫官猶未設誠爲曠典伏
望於廷臣中選其色溫氣和進止從容明先王
之道合乎當今之宜不激切以沽名不矯亢以
立異者二負俾爲諫議大夫使之開陳治道啓

沃聖心此誠當今要務也孟子云責難於君謂之恭況吾皇聰明仁聖不以爲難必能賞諫臣以來天下之善言矣

三曰祀勲臣大禘詩曰實維何衡實左右商王禘于太祖則知當時功臣與祭故末章明言伊尹也盤庚告羣臣曰茲予大享于先王爾祖其從與享之是知功臣配享實始於殷孔安國曰古者錄功臣配食于廟祭于大烝烝冬祭也謂之大者物成衆多之時其祭於三時爲大也孔穎達曰近代以來功臣配食各配其所事之君

周禮司勲凡有功者銘於王之太常祭於大烝此功臣配享之見於經者也故唐以房玄齡高士廉屈突通配食太宗以馬周張行成李勣配食高宗宋以趙普曹彬配食太祖以薛居正潘美石熙載配食太宗其餘各以功臣配此功臣配享之見於史者也欽惟我朝自

太祖皇帝肇起朔方奄有區宇開國元勳皆蒙古大臣表表見於世者甚多今國家除薦新外十月上旬大祭誠合古者冬祭大烝之禮宜以功臣配享不惟不忘舊勳實有以勉厲羣臣雖

古人泰山若礪黃河如帶之意何以過此望令
近臣講究太祖以來蒙古大臣各配食於所
事六列帝之庭是誠一代之盛典傳諸無窮矣
四曰定配享自唐祀夫子配以顏子至宋陞孟
子與顏子並配然當時未知道統之傳也自伊
洛之學興性理之說明始以顏曾思孟並列于
夫子之左蓋得夫子之傳者顏曾子思也得曾
思之傳者孟子也道統之傳於是得其序矣故
江南諸路廟學皆以四子並配以子張居七十
二子之首自兩廡升於十哲以補曾子之闕雖

云亡宋之制然綱常名教所係此當因而不當
革者也今京師廟學與河北諸路府學並循亡
金之舊左顏右孟與夫子並居南面奚有是理
哉孟子學於子思子思學於曾子是知孟子乃
曾子門人之弟子曾子乃孟子師之師也今屈
曾子於從祀之中降子思於廊廡之末師之師
不過一遵一豆門人弟子牲牢幣帛一與先聖
等又豈有是理哉況今天下一家同軌同文豈
容南北之理各異也或謂學校所以明人倫然
路點皆父也回參皆子也子先父食於理安乎

竊以爲不然蓋廟學乃國家通祀猶朝廷之禮也父爲庶僚子爲宰職各以其德與勲也如遇朝會殿庭班列則父雖尊安能超之上哉殊不知抑私親而昭公道尊道統以崇正學乃所以明人倫也如今序傳道之配使顏曾思孟並列於夫子之左虛其右隅以避古者神位之方自兩廡升子張於十哲以補曾子之闕不惟先儒師弟之禮不廢使南北無二制天下無異禮亦可以見我朝明道統得禮之中足以垂世無窮矣

五曰舉遺逸天生一世之才足以供一世之用顧其用之者何如爾科舉之法實始於隋唐後世因之而科舉益盛然科舉與辟舉之法並行故唐之人才爲盛然房杜裴郭諸公未必盡出於科目也宋起孫明復於泰山而處之胄監拔蘇洵於眉山而進之容臺擢程頤於西洛而寘之講筵所以尊尚有德自足以聳動天下而人才之盛職此之由今罷薦舉獨行科舉之法命有司以防姦欺設邏卒以檢懷挾功名之士不拘小節固不以為嫌彼恬退高蹈之士必不屑

就大抵科目固足以得士亦豈能盡得天下之賢中人已下之資可以利誘若學際天人道全體用者安肯決策辱於三場競是非於寸匙哉當於科目之外別立薦舉之法若學行兼備肥遯林泉不求聞達不屑科目者聽所在保舉待以不次夫如是不徒有以獎技恬退而野無遺賢之美溢於唐虞矣

太廟室次議

劉致

竊以禮莫大於宗廟蓋宗廟者天下國家之本禮樂刑政之所出也唐虞三代漢晉唐宋靡不由之洪惟

聖元龍興朔陸

聖聖相承積德累功百有餘年

大經大法固已追遠唐虞三代而宗廟未有一定之制方聖天子繼統之初衆正登庸之日定一代不刊之典而爲萬世法程正在今日適茲新廟告成奉遷伊邇其合於禮而宜於今者固當議而行之也按王制天子七廟三昭三穆與太祖之廟而七孫毓曰太祖在北左昭右穆差次而南賈公彥曰后稷居中昭處於東穆處於西古者父子不並坐昭穆所以別父子遠近親疎之序而使不亂也兄弟共為一世昭皆為昭穆皆為穆七世而止

唐增為九世十二室趙宋因之為十二室世有定數而室無定數其室次以西為上太祖居西夾之東為第一室以下各序昭穆次第而東聖朝取唐宋之制定為九世遂以舊廟八室而為六世太祖居中為第一室為一世睿宗居西為第二室為一世世祖又西為第三室為一世裕宗又西為第四室為一世順宗居太祖之東為第五世成宗又東為第六室元第二室為一世

武宗又東為第七室

仁宗又東為第八室以無餘室結綵殿於東壁近南兄弟二室為一世故八室止為六世其制頗與賈公彥后稷居中之制相近而昭穆不分父子並坐不合禮經新廟之制一十五間東西二間為夾室安奉

太祖皇帝為萬世不遷之祖所存十室太祖既居中則唐宋之制不可依惟當以賈公彥昭穆次序而列之也父為昭子為穆則睿宗當居太祖之東為昭之第一世

世祖居西為穆之第一世

裕宗居東為昭之第二世兄弟共為一世則

成宗順宗顯宗三室皆當居西為穆之第二世

武宗仁宗二室皆當居東為昭之第三世

英宗居西為穆之第三世昭之后居左穆之后居

右西以左為上東以右為上苟或如此則昭穆分

明秩然有序不違禮經膺合事宜誠一代不刊之

典可為萬世法程也若以舊廟為累朝定依室次

於新廟遷安則顯宗躋順宗之上為東之第一

室居裕宗之下則為西之第五室顯宗之室

定而英宗之室始可議焉蓋

顯宗在東則

仁宗以下更無餘室

顯宗在西則

英宗當祔

仁宗之下以禮言之春秋閔公無子庶兄僖公代

立其子文公遂躋僖公於閔公之上書曰逆祀及

定公正其序書曰從祀先公為萬世法然僖公猶

是有位之君尚不可居弟之上况未當正位者乎

若以此言之則成宗宜居上順宗次之

顯宗又次之若以國家兄弟長次言之則顯宗

固當居上顯宗次之成宗又次之英宗居

西祔裕宗之下則兄躋弟上猶為逆祀而孫居

父祖之上可乎國家雖曰以右為尊然古人所尚或左或右初無定制古人右社稷而左宗廟國家宗廟亦居東方蓋謂之所當然也豈有建宗廟之方位既依禮經而宗廟之昭穆反不應禮經者乎且如今之朝賀或祭祀宰相獻官分班而立居西則尚左居東則尚右及行禮就位則西者復尚右東者復尚左矣公私大小燕會亦然但人不之察耳致職居博士宗廟禮文之事所宜建明然事大體重宜從使院詳酌行移集議取自
聖裁

貞定王華宮罷遣太常禮樂議

元永貞

竊聞天子七廟萬世之通義三代以還莫違茲道原廟之制隆古未聞漢孝惠從叔孫通之請始詔有司立原廟遂有衣冠月出遊之名其後郡國所在因各立廟至元帝永平四年貢禹奏郡國祖宗廟不應古禮宜正定天子是其議罷之謹按尚書黜於祭祀時為弗欽春秋之義父不祭於支庶君不祭於臣僕之家伏觀聖朝建立七廟崇奉孝享可謂至矣而睿宗皇帝神御別在貞定路玉華宮竊惟有功德於天下者莫如

太祖皇帝 世祖皇帝 太祖皇帝不聞有原廟
世祖皇帝神御奉安大聖壽萬安寺歲時差官以
家人禮祭供不用太常禮樂今玉華宮原廟列在
郡國又非龍興降誕之地主者以臣僕之賤供奉
御容非禮之甚伏望朝廷稽前漢故事致隆太廟
玉華宮照依京師諸寺影堂例止命有司以特祭
供罷遣太常禮樂非獨聖朝得典禮之正而在天
之靈無褻黷之煩而禮官免失禮之責矣

元文類卷第十五

元文類卷十六

表

東昌路賀平宋表

徐世隆

聖人之兵仁而威無遠不服天下之勢離必合有
險即平方期四海之會同豈許一江之限隔捷書
屢至慶頌交馳欽惟

皇帝陛下至德體元中華開統美化既東西之被
兼愛豈南北之分初遣文臣播告方國昭示包荒
之量絕無陵弱之心弗圖島夷輒拘使節誘納我
叛將盜據我歷城雖就鯨鯢之誅尚遺蜂蟻之毒

蠢爾三苗之弗率命予群后之徂征一鼓而定荆
襄再駕而降鄂岳斬黃面縛江池心歸鐵瓮之堅
城已摧金陵之王氣何在楚地六千里不勞秦將
之增兵錢塘十萬家坐見吳王之納土偽將悉朝
於闕下幼君遐竄於海中方知恃險而亡應悔求
和之晚茲雖天意實出聖壽歷觀往古混一之難
未有今日飛渡之易臣某等叨居牧寄喜聽凱音
矧曾充載筆之臣尤當述集勲之事駿奔効命正
海內一家之時虎拜揚休上 天子萬年之壽

車駕班師賀表

中統元年九月為李冶
真定廉宜撫作

臣某等言伏為逆黨悉平車駕迴轅者黃鉞耀威
果凶徒之一掃翠華旋軫遽明詔之載頒率土皆
臣普天同慶伏以周之熙朝而造管叔武庚之役
漢之盛世而行淮南濟北之誅事豈樂為兵非得
已屬者逆屬相煽狂童恣行潛包禍心構成內難
惟聖人必欲去害肆 天子所以有征爰興問罪之
師庸示安民之勇靈旗順指醜類畢燔衣暫試於
一戎月連飛於三捷春生秋殺玄化何私天動星
迴鴻鈞自斡宗桃鞏固永孚無疆之休日月貞明
定為群目之用此蓋

皇帝陛下運膺千載道貫九皇雄斷電馳廟謨洞
徹既多筭以勝小筭況至仁而伐不仁是宜氛祲
廓清車書混一大統會歸於中統太平今睹於開
平凡在陶甄疇非鼓舞臣某等忝以守官於蕃翰
不獲稱慶於闕庭想迎六尺之輿遙祝萬年之壽

賀平宋表

孟祺

臣伯顏等言國家之業大一統海岳必明主之歸
帝王之兵出萬全蠻夷敢天威之抗始干戈之爰
及迄文軌之會同區宇一清普天均慶欽惟
皇帝陛下道光五葉統接千齡瑞氣日出之邦冠

帶月支之國際丹崖而述職奄瀚海以爲家獨此
宋邦弗遵聲教謂江湖可以保逆命舟楫可以敵
王師連兵負固踰四十年背德食言難一二計當
聖主飛渡江南之日遣行人乞爲城下之盟逮凱
奏之言還輒姦謀之復肆拘囚我信使忘乾坤再
造之恩招納我叛臣盜漣海二城之地我是以有
六載襄陽之討彼居然無一介行李之來禍既出
于自求怒致聞於斯赫臣肅將禁旅恭行天誅爰
從襄漢之上流復出武昌之故渡藩屏一空於江
表烽煙直接於錢塘尚無度德量力之心乃有殺

使毀書之事屬廟謨之親稟謂根本之宜先乃命
阿剌罕取道於獨松董文炳進師於海渚臣與阿
朮阿荅海等忝司中閫直指僞都犄角之勢既成
水陸之師並進常州一破列郡傳檄而悉平臨安
爲期諸將連營而畢會彼極窮蹙足迭出哀鳴始則
爲稱姪納幣之祈次則有稱藩奉璽之請顧甘言
何益於實事率銳旅直抵其近郊召來用事之大
臣放散思歸之衛堀強心在四郊之橫草都無
飛走計窮一片之降幡始豎其宋國主率諸大臣
已於二月初六日望闕拜伏歸附訖所有倉廩府

庫封籍待命外臣奉揚寬大撫戢吏民九衢之市
肆不移一代之繁華如故茲惟睿筭卓冠前王視
萬里爲目前運天下於掌上致令臣等獲對明時
歌七德以告成深切龍庭之想上萬年而爲壽更
陳虎拜之詞

進授時曆經曆議表

楊桓

協時正日國政之大端章往考來曆書之明驗一
或失應衆所共瞻豈天運之靡常殆入爲之未密
昔稱作者初匪一家其始也莫不精微未幾則旋
聞踈闊蓋由年拘積筭日括周分不知闕測以考

真率多傳會以求合必欲行於末久詎容失之毫
釐幸當累洽之辰共仰同文之治事加詳覈法貴
變通欽惟

憲天述道仁文義武大光孝皇帝陛下政順陰陽
德齊宮壤燭消息盈虛之理得裁成輔相之宜爰
命文臣若稽乾象畫則考求實晷夜則揆度中星
察氣朔之後先定躔離之朏胸精思密索討本窮
原革前人苟簡之規成盛代不刊之典其為要旨
具載成書所有授時曆經三卷立成二卷轉神注
式一十三卷曆議三卷已繕寫成二十一冊隨表

上進干冒天威不勝惶懼震越之至謹錄奏聞伏
候敕旨

進實錄表

王惲

典謨述堯舜之功令名顯著方冊布文武之政義
問宣昭粵自漢隋及夫唐宋咸有信史以貽後來
況大業豐功震今耀古惟深善述首議丕揚洪惟
世祖皇帝仁孝英明睿謀果斷爰從潛邸有志斯
民植根幹而佐理皇綱聘耆德而講明治道始平
大理再駕長江過化存神有征無戰迨其龍飛灑
水鼎定上都革弊政以惟新擴同仁而一視規模

宏遠朝野清明內則肇建宗桃創設臺省修舉政
令登崇俊良外則整治師徒申嚴邊將布揚威德
柔服蠻羌加以聖無不通明靡不燭守之以勤儉
朴素養之以慈惠雍和收攬權綱綜覈名實賞罰
公而不濫號令出以惟行萬彙連茹群雄入彀削
平下土統正中邦慕義嚮風聲教實朔南之暨梯
山航海職貢無遐邇之殊方且開學校而勸農桑
考制度而興禮樂國號體乾坤之統書畫煥奎壁
之文罄所有而疇戰功不待計而救民之聽言擇
善明德綏刑歛福錫民遇災知懼得洪範備皇之

理過周宣修政之勤以致時和歲豐民安吏職蓋
帝德克周於廣運故至公均被以無方可謂文致
太平武定亂略繼一祖四宗之志兼三皇五帝之
功開天立極者三十五年立經陳紀者二萬餘事
以謙讓弗違於備紀故纂修未至於成書欽遇
皇帝陛下寅紹詒謀厲精圖治亟鑒觀於成憲思
適駿於先聲深詔下臣俾爲實錄宅心宗柘疑孝
羹墻開館局而增置官僚敕群司而大紬圖籍編
摩既富搜訪加詳采摭於時政之編參取於起居
之注張皇初藁增未見於罕聞承奉綸音俾蠲繁

而就簡俯殫管見仰體宸衷盡略虛文一存實事
其饗會征伐文物典章祭焉列三代之英蔚爾開
萬世之業與夫才德孝廉之士忠良姦佞之臣版
圖生齒之繁則賦畜牧之盛謹依條據粗致無遺
今具所修成

世祖皇帝實錄二百一十卷事目五十四卷聖訓
六卷凡二百七十卷謹繕寫為二百七十帙用黃
綾夾復封全隨表上進臣等忝備台司幸膺盛典
顧惟載筆才何有於三長勉進蕪辭慮庶幾於一
得冒瀆 聖聽不勝驚惶

進三朝實錄表

皇慶元年十月進

程鉅夫

一人御極聿嚴金匱之藏 三后在天實監玉堂
之紀粵若稽古克底成書欽惟

皇帝陛下孝友慈仁溫文睿哲統之垂業之創念
昔繼承功以著德以彰在茲纂錄首崇筆削之任
式宏龜鑑之圖臣等職忝禁林才非良史繫年繫
月豈足盡於先朝作典作謨庶有徵於今日臣等
以所編成

順宗皇帝實錄一卷

成宗皇帝實錄五十六卷事目十卷制詔錄七卷

武宗皇帝實錄五十卷事目七卷制詔錄三卷總計一百三十四卷繕寫已畢謹具進呈

翰林國史院陞從一品謝表 程鉅夫

天開文運治載睹於熙朝地切詞林恩比崇於極品群情胥悅斯道增華欽惟

皇帝陛下德與日新聖由天縱禮儒臣而加異相古所無進院秩以示優自今伊始親授銀章之重益爲玉署之榮臣等學愧前修位隆徃代典謨訓誥敢忘黼黻之勤元首股肱願效賡歌之盛

謝賜禮物表

吳激

接地風雲際會親逢於明主麗天日月照臨遠及於老臣賜之以府庫之財衣之以筐篚之幣承恩過厚揆分何堪俯瀝愚衷仰塵睿覽伏念臣荆揚賤士樵牧孤蹤幼誦孔氏之遺書無繇見道長值朝家之興運有幸爲民愧碌碌之謏才乏卓卓之奇節以言其文章則體格卑陋以言其學行則器識凡庸自甘晦迹於深山豈覩發身於昭代大鈞靡不覆燾小物亦預陶鎔惟

成宗法至元首賁丘園之隱歷

武宗逮延祐游泮館閣之華

先帝擢之禁林
今皇處以經幄講讀古訓對揚耿光誤蒙上聖
之簡知得廁群賢而布列然大馬餘齒已非少壯
之年而螻蟻微誠莫展驅馳之志外之弗能效勤
勞於郡縣內之弗能裨謀議於廟堂糜廩粟費俸
錢素餐甚矣辱高位速官謗清論凜然因負米薪
之憂遂辭視草之職雖心同葵藿常戀闕庭柰景
迫桑榆宜歸田里未嘗毫釐有補於國況又耄耋
無用於時淵度涵容寵錫優渥茲蓋欽遇
皇帝陛下乾坤博施海宇皆春忍令散材泯沒於

泥塗欲俾寸草沾濡於雨露閔憐周恤固君父側
隱之仁悃欵控陳乃臣子辭讓之禮倘冒昧而拜
貺實踧踖以懷慙敢致懇祈乞垂矜允收此九重
之大惠全其一介之小廉壹是歡榮等如祇受臣
栖遲畎畝既難強筋力以輸忠教誨子孫誓當竭
精神而報上所賜鈔定段疋除已嚮闕謝恩外未
敢欽受謹奉表辭謝以聞

進實錄表

至治三年
二月進

袁楠

十年御極聿修四繫之編億載揚休殊乏三長之
筆祇成信史上徹宸旒洪惟

仁宗聖文欽孝皇帝仁靜根心溫恭合德詩書造
士闡學制以設科法律爲師嚴官規而限祿誅經
作則稽古鑑今著龜定主鬯之公域樸藹奉璋之
衆宜登琬琰求祕縑緗欽惟

繼天體道敬文仁武大昭孝皇帝陛下慕切羹牆
令行金石率時昭考撫言行以無遺迪惟前人繼
聖明而有造臣等尊聞傳信竭思纂題閱歷歲年
已深慙於尸素經緯日月期不朽於汗青臣某等
所編成

仁宗皇帝實錄六十卷事目一十七卷制詔錄一

十三卷總計九十卷繕寫已畢用黃羅袱封全註
具進呈

賀登極表

虞集

鴻業啓圖世守肇基之迹龍庭受賀躬膺大慶之
歸欣戴云初謳歌爲盛欽以

世祖紹統乾之運

裕皇隆出震之名推一本之均齊累四朝之繼及
於惟景命監至德之無私粵在

太宗御禎符而有慶天心攸屬國勢以安欽惟

陛下道合彌綸功存綏撫立長式遵於家法計宜

允協於輿情車服旌旗皆我祖宗之舊星辰河
嶽赫乎宇宙之新時開泰平人用寧壹臣等叨承
重任適際昌期建皇極以敷言親揚彝訓坐明堂
而布政求贊成能

經筵官進職謝恩表

虞集

聖作稽古知崇效天開筵肆講於前經當宁屢煩
於明詔垂憲萬世一新經緯之文有臣十人並拜
便蕃之賜獨興睿斷創始明時伏惟昔者明王不
以天縱而自聖本之先哲式資道揆以開人故伏
義則畫於河圖神禹錫疇於洪範九將圖治慎在

求聞蓋帝王傳授之精布乎方冊而古今治亂之
迹可以鑑觀爰咨博洽之材用廣聰明之職然守
職業者特見諸政事之著惟事啓沃者先端其心
術之微故茲曠典之行實重貢儒之寄必經業可
以發聖賢之蘊必器能可以相禮樂之成必養德
之全素蒙孚信必至誠之積可致感通苟非其人
不稱茲選而臣等性本固陋學尤迂踈守其師說
之遺僅不忘其章句及轉國人之譯粗可達其性
情所謂材有限而道無窮心欲言而口不逮猶重
昔人之嘆況乎臣等之愚是故設醴上尊敷擅廣

屢既極詢諮於累歲茂聞補報之微功敢謂能自得師坐而進道更錫官聯之重俾專誦說之司雖竊恩榮愈增憂責負茲蓋伏遇

皇帝陛下以乾坤之德爲德以堯舜之心爲心無一念不在於民生無一事不遵於祖憲遐方畢服猶虞水旱之爲災群賢在朝尚恐俊良之攸伏必合二帝三王之至盛以登四方萬國之太平下收瑣末於芻蕘俾益消埃於山海臣等敢不力循古訓各盡微衷非先王之法不敢言冀必由於正路雖末世之事不敢避庶有戒於前車尚勸九歌用

稱萬壽

進實錄表

至順元年五月進

謝端

瑤圖啓運新元會之重熙金匱紬書述先朝之顯烈素慚載筆今幸成編洪惟

英宗睿聖文孝皇帝德洽堪輿恩覃動植制禮作樂粲乎宗廟之儀登明選公秩若朝廷之紀四年無前之盛治兆民至今而永懷惟刪定之公乃可稱於信史固纂修之文將有俟於明時欽惟

皇帝陛下通駿有聲粵若稽古謂文武之道必方冊而後傳而堯舜之心在典謨而可舉彰繼述之

善志大揚厲之洪休蓋尊所聞莫匪爾極臣等事
徵四繫學愧三長煥乎文章無能名其爲大寫之
琬琰庶有補於將來臣等所編成

英宗皇帝實錄四十卷事目八卷制誥錄二卷總
計五十卷繕寫已畢謹具進呈

進經世大典表

至順三年三月進

歐陽玄

堯舜之道載諸典謨文武之政布在方冊道雖形
於上下政無間於精粗特於紀錄之間足見彌綸
之具是以秦漢有掌故之職唐宋有會要之書于
以著當代之設施于以備將來之考索我國家受

命龍胡續休鴻基發政施仁行葦之忠厚世積制
禮作樂關雎之風化日興紀綱具舉於朝廷統會
未歸於簡牘欽惟

欽天統聖至德誠功大文孝皇帝陛下總攬群策
躬親萬幾思祖宗創業之艱難與天地同功於

經緯必有鋪張以揭皦日必有述作以藏名山爰
命文臣體會要之遺意徧勅官寺發掌故之舊章
倣周禮之六官作皇朝之大典臣某叨承旨喻
俾綜纂修物有象而事有原質爲本而文爲輔百
數十年之治蹟固大畧之僅存千萬億世之宏規

在鴻儒之繼作謹繕寫 皇朝經世大典八百八十卷目錄十二卷公牘一卷纂修通議一卷裝潢成秩隨表以聞伏取進止

元文類卷第十六

元文類卷第十七

表

賀正旦表

劉敏中

曆頒夏正大春秋一統之書禮謹漢儀受圖頁四方之賀歡均朝野慶洽天人中賀剛健體元寬仁育物董官常而敷聖訓炳如日月之臨恤民隱而降德音翕叶地天之泰至和斯應景福維新臣等夙被龍榮忝司端樞無尺寸效仰禪財成輔相之功願億萬年來享伴無疆游之樂

賀冊后表

楊文郁

聖德日新端齊家以身之本坤元位正備臨軒發冊之儀慶溢九重歡騰四表中賀受天成命遵祖詒謀謂王教攸其莫若人倫之重然治道之至庶資內治之勤昭法象於軒星崇聲明於椒掖以贊嚴宸之孝理以協太母之徽音臣等服在近司顒觀盛際道符羲易占順承載物之身願禱封申富壽多男之祝

賀元旦表

姚登孫

寶曆晨開恩誕敷於朔紀瑤池春滿慶先朝東朝日月清華神民闔澤中賀道符乾統

圖懿範難名備聖人之全德仁規妙運濟天下於太寧壽並兩儀福延萬世臣等班聯文石職忝膠庠仰測卦爻喜三陽之通泰俯陳歌頌奉億載之怡愉

賀建儲表

姚登孫

坤元居上挾皇統於中天震器有歸衍係謀於奕世神人闔澤河岳清寧中賀聖德難名徽音夙著心游太極兩儀妙玄範之功身佑三朝九鼎重宗磐之勢適春宮之肇建知景命之未延臣等嘉與諸儒欣逢盛典日月啟重光之運幸園照臨華嵩

開萬壽之期惟慶歌頌

賀聖節表

李之紹

寶曆建元協重華之嘉運瑤光貫月開上聖之貞符盛德在秋昊天有命中賀聰明稽古孝友根心丕顯文謨端拱巖廊之上達觀新邑式均道理之中揆震夙之昌辰卜豐穰于今歲璇璣肇紀玉斗儲祥臣等肅謹班聯遙瞻粹穆宣昭鴻業載賡七月之詩耆定武功願繼萬年之雅

賀聖節表

鄧文原

天開景運篤有道之曾孫電繞神樞受人福於王

毋觚稜瑞靄閭闔臚傳中賀誕紹鴻圖丕承駿命

至仁育物得秋而萬寶成盛德在躬居所而衆星拱當立經陳紀之始為施仁發政之規郊廟肇禋朝野胥樂臣等名叨玉署目極璇霄廣文王有聲之詩載歌律呂衍殷宗無逸之壽虔祝華嵩

賀正旦表

盧亘

瑤圖星拱禮盛三元璇宇天臨懽同九有煥宋文於懿範洽聖孝於英猷中賀迪喆徽柔濬幾淵靖崇勲廟社消群慝而佑顯謨決策宮闈定神器而凝景命妙用夙諧於坤載大明參懋於乾剛臣等

又玷中書肅承內治儀新鴻號深仁昭被於綿區
嘉錫隆禧慈訓永光於汗簡

賀親祀太廟表 延祐七年

九重御極太平端拱於中天萬舞奏庭盛禮告成
於清廟群方胥贊百辟交孚中賀剛健日新聰明
時憲祖有功宗有德行歷服之無疆車同軌書同
文底烝民之作又衮冕華昭於日月笙鏞和協于
神人崇億載之洪基舉累朝之曠典臣等忝司政
府肅侍齊宮邊豆駿奔仰宣室之慶衣冠稱
賀效華封祝聖之誠

賀親祀太廟表

天曆元年

虞集

寶曆在躬祗服 祖宗之訓太宮修祀於昭禮樂
之文海宇均安神人交暢中賀德崇恭讓道積寬
仁艱難具察於民勞僕戴密繇於天授卿雲就日
護璽綬以來歸瑞雪宜年洗干戈而載戰圭衮會
龍章之盛簫韶致鳳羽之儀臣等備位台衡依光
宸極群工述職贊文治之成功萬壽膺符受明禋
之純嘏

賀聖節表

虞集

春回正月律和舞鳳之庭日浹芳甸瑞紀流虹之

渚縟儀游舉治象更新中賀盛德在躬至仁育物
紫微華蓋煥乎經緯之爲章朱草醴泉妙與生成
而合化天開壽域人樂熙辰臣等弱翰無功清光
有赫對揚休命絲綸緝黼黻之文歌頌永年簡冊
載衣裳之治

賀正旦表

虞集

陽春發育明新若日之方中正朔會同溥博如天
之爲大顯承盛化協慶昕庭中賀神武成功至文
備德綜萬機而益裕達四聰而弗遺禮樂從容建
用維皇之極圖書宣朗緝熙於穆之純假郊廟以

受釐率臣民而錫福臣等叨陪鼎鉉式贊鈞陶時
和歲豐願保無疆之祚風淳俗美永歌有道之朝

賀正旦表

宋本

泰元神筴天開六甲之端北斗帝車星直三朝之
旦立政伊始與時皆新中賀睿知有臨明哲作則
萬機初振熙鴻號於紀年九廟載安被龍光於宗
黨誕啓用材之路式推澤物之仁臣等身際昌辰
首班著位風行雷動賡歌殊愧於古初日升月恒
善頌惟先於壽考

賀親祀南郊表

至順元年

謝端

四方于理事天致恭已之誠三年而郊卜日叶用
辛之吉功成治定禮備樂和中賀端拱無爲絕一
不二肇興明禋之典載嚴升配之文大呂黃鐘音
協雲門之奏鎮圭纁籍輝聯蒼璧之華祥風和氣
之與游景星慶雲之疊見穹示集既宗社蒙休臣
等叨佐清朝欣觀熙事列園壇之八陛幸陪漢時
以待祠陳泰階之六符願舉兒觴而上壽

牋

賀正旦牋

夾谷之奇

位拱少陽仗簇黃麾之曉氣暄太簇祥開青禁之

奉邦本益隆輿情胥慶中賀仰遵聖訓參洪政機
執中傳精一之心作貳毓元良之望重明繼照陰
邪常遏於未形九四在淵陽德克潛於已著茲履
端之云始宜介福之孔多某等素乏長材叨居端
尹星輝海潤莫酬沾被之恩月恒日升第祈綿延
之筭

賀千秋牋

揚文郁

陽常居於大夏方收養毓之功震一索爲長男載
啓亨嘉之會慶鐘甲觀歡溢寰區中賀克哲克明
允文允武春坊翊善茂隆邦本之貞曉寢問安長

奉天顏之喜茲臨彌月之節宜膺百順之祥臣等
竊備詞官進趨庭賀幸聞樂府奉重暉重潤之章
請合輿情上俾熾俾昌之壽

賀千秋牋

袁桶

心依宸極前星耀於明堂卯為春門大電環于甲
觀盛德集福至和儲祥中賀體仁法元師古合道
溫恭亨 帝密輔相以生成問學積躬益緝熙而
光大疇咨黃髮之彥庸佐青闈之規茂對誕辰宜
膺純嘏某等肅瞻儲禁忝職詞林鶴駕陳儀喜最
顏於兩殿鴻圖衍慶願介壽於千秋

賀正旦牋

虞集

玉燭調元播陽春於萬物禕衣乘翟奉景福於一
人權溢宮闈慶延宗社中賀柔嘉維則博厚無疆
帝業中興五色鍊補天之石女功內治七襄成報
日之章膺璠璫之穠華衍金支之奕葉茂迎蒼曆
益介洪禧某等備位外廷稱觴前殿二南風化歌
關雎正始之音萬年室家樂既醉太平之運

箴

綱齋箴

鄧文原

元坦使君以綱名齋屬巴西鄧文原敷繹其義乃

作箴曰

維古憇人德美內 揚休弗矜反躬藏密在易坤
厚合章可貞明夷莅衆用晦而明善欲淵潛志無
銜飾辟諸褻襲身章之則彼夸毗者內視飲如迺
崇澆偽以眩群愚鼓鍾有聞屋漏滋愧爾車甚澤
而人斯瘁繫南郭子尚絅是遵匪曰隱几式人書紳
慎獨箴 安熙

可尊者德可畏者天無處不有無時不然念慮之
發必有其幾勿隱其隱勿微乎微從事於斯是曰
慎獨自此精之萬物並育豪髮有間天理弗存利

欲紛拏厥心則昏於乎戒哉敬作此箴書諸座隅
以警其心

銘

簡儀銘

姚燧

舊儀昆侖六合包外經緯從橫天常袞帶三辰內
循黃赤道交其中四遊頰仰鈞簫九今改爲皆折
而異絲能疏明無窒於視四遊兩軸二極是當南
軸攸杳下乃天常維北歌頌取軸架應鑊以百刻
及時初正赤道上載周列經星三百六十五度奇
贏地平安加立運所履錯勒干隅若十二子五環

三旋四衡挈焉兩綴闕距隨揆畱遷欲知出地完
茲立運去極幾何即遊是問赤道重衡四弦未張
止結北軸移景相望測日用一推星兼二定距入
宿兩候齊視巍巍其高莫莫其遙蕩蕩其大赫赫
其昭步仞之間肆所廣攷明乎制器運掌有道澹
簡而中用密不窮歷校古陳未與侔功猗歟
皇元發帝之蘊界厥義和萬世其訓

仰儀銘

姚燧

不可形體莫天大也無競維人仰金載也六尺爲
深廣自倍也兼深廣倍挈金兌也振漑不洩縉以

澮也正位辨方日子卦也橫縮度中平斜再也斜
起南極平金鐵也小大必用入地畫也始周浸斷
浸極外也極入地深四十太也北九十一赤道斷
也列刻五十六時配也衡竿加卦巽坤內也以負
縮竿子午對也末旋機杖窾納芥也上下懸直與
鐵會也視日漏光何度在也暘谷朝賓夕餞昧也
寒暑發歛驗進退也薄蝕終起鑿生殺也以避赫
曦奪日害也南北之偏亦可槩也極淺十七林邑
界也深五十二鐵勒塞也淺赤道高人所載也夏
短冬永猶少差也深故赤平冬晝晦也夏則不沒

求短最也二天之書曰渾蓋也一儀即揆何不悖也
也以指爲告無煩喙也閭資以明疑者沛也智者
是之膠者怪也過者巧曆不億輩也非讓不爲思
不遠也將窺天朕造物愛也其有俟然昭
聖代也泰山礪兮河如帶也黃金不磨悠久賴也
鬼神禁訶庶勿壞也

漏刻鐘銘

姚燧

靈臺設簾魏以尊元間大呂非其梟執曠善鼓掌
自煩宮商良諧等金盆請無以聲以功論一日之
中兩昕昏一鳴一刻有度存九圍一圃折柳樊黔

首時作時養殮日月如是相告敦三辰聽命循軌
垣四序不忒迭寒暄萬物生翕盈乾坤何獨治歷
適此源凝熙帝績高羲軒積世而運會而元吉金
之舌憤莫捫輟響誰其代天言

渾象銘

楊桓

於昭今聖皇德惟天希密察乾坤動符化幾乃命
太史考順求遠制器象天具體而微度數棊布星
次珠輝道分黃赤擬議玄規兩極低昂中主璇璣
匱方象地極樞以維地本天函術取外圍反而觀
之其趣同歸體雖至約用足明

天外觀天之裏合象之背日月交錯五行進退造化無窮不出戶內始終參求簡儀是配於昭聖皇夙夜睿思先天天合後天奉時先後惟天聖皇無爲

玲瓏儀銘

楊桓

天體園穹三辰在中星雖紀度天實無窮天度之數環周三百六十五度四分度一因星而步推日而得月次十二往來盈虧五星參差進退有期判爲寒暑分爲四時太史司天咸用周知制諸法象各有攸施萃於用者玲瓏其儀十萬餘目經緯均

布與天同體協規應矩徧體虛明中外宣露玄象森羅莫計其數宿離有次去極有度人由中闕目即而喻先哲實繁茲制猶未逮我皇元其作始備實因於理匪鑿于智于萬斯年寶之無墜

高表銘

楊桓

聖人修政唯農是本農之所見時則爲準過與不及民安究之動措由中聖人授之時在於天術何以得制器求之乃見天則日月周運閏餘歲成盈虛消息在表斯徵分至既辨氣序乃會朔晦一定弦望由對爰演斯曆用詔民時百工允治庶績用

熙表中以正圭平以直不言而諭與時借極天德
茫茫參以明焉民生皞皞振以興焉惟昔八尺景
從分密爲用雖可每艱辨析 聖皇御極百度惟
新乃五其音其用益神表高之法先哲匪憚其顛
景虛取的是患表梁上陳景符下依符竅得梁景
辰精微揆月有方闕几是映几限容光圭表交應
器術之密推步之精歷古于今斯異其能上天之
載無聲無臭 聖皇儀刑在其左右仁民育物以
對天祐眉壽萬年寶茲悠久

太史院銘

楊桓

天厭下土之亂眷求聖哲以作民主

太祖聖武皇帝應運挺生以神武戡除禍難遂定
皇元之寶命 聖皇有德增功績烈逮今

憲天述道仁文義武大光孝皇帝稟資聖神自潛
藩邸躬率師旅有征無戰天心人心攸屬攸係及
位中國大建都邑任賢使能分設百官政教既行
乃制禮作樂廟享 祖宗仍遣將帥四征未臣始統
一六合周臨天際端居無爲飛潛動植仁惠溥露
民既無事唯夫耕女織工器商貨自勞衣食 聖慮
周悉允厚民生者無不爲之以農事爲四民衣食

之本既設有司以董其勤又思爲振舉之務乃立
太史院以講明天道敬授民時焉至元十三年
上以循用大明曆久而失當欲創其制以太子贊善
臣王恂業精筭術凡日月盈縮遲疾五星進退見
伏昏曉中星以應四時者悉付其推演尋遷太史
令以都水監臣郭守敬穎悟天運妙於制度凡儀
象表漏考日時步星躔者悉付規矩之尋授同知
太史事曆成遷太史令以前中書左丞臣許衡爲
命世之賢凡研究天道斟酌損益者悉付教領之
輔以集賢學士臣楊恭愷其提挈綱維始終弼成

者實前中書左丞轉大司農臣張文謙尋以昭文
館大學士領太史院事凡工役土木金石悉付行
工部尚書兼少府監臣段貞以經度之凡儀象表
漏文飾匠制之美者悉付大司徒臣阿你哥十六
年春擇美地得都邑東墉下始治役垣縱二百布
武橫減四之一中起靈臺餘七丈爲層三中下皆
周以廡其下面日中室爲官府以總聽院政長曰
令次同知院事次命院事以宰輔之重領於上者
無定負其屬有主事有令譯史有幹事有庫局之
司左右旁室以會司屬議凡推測星曆諸生七十

人莅以三局一曰推筭其官有五官正有保章正有副有掌曆分集於朝室二曰測驗其官有靈臺郎有監候有副三曰漏刻其官有挈壺正有司辰郎分集於夕室凡器用出納於陰室中層離室以列景曜巽室以措水運渾天壺漏坤室以措渾天象蓋天圖震兌二室以圖南北異方渾天蓋天之隱見坎室以位太歲乾室以貯天文測驗書良室以貯古今推筭曆法臺顛設簡仰二儀正方案專簡儀下靈臺之左別爲小臺際葺周廡以華四外上指玲瓏渾儀靈臺之右立高表前爲堂表北東

石圭圭面刻度景丈尺寸分圭旁夾以連葺可圭上露天日爲度景計靈臺之前東西隅置印曆工作局次南神厨筭學設位如上初改曆之議既行即遣官四遠測景以相參驗若高麗瓊崖成都和林蓋擬羲和仲叔之命又自上都南五千里中若東平陽城鄂吉等州各遣官測驗以求遠近之數十七年冬至以新曆進遷官嘗覓有差十八年頒行之十九年以祕書少監臣趙秉溫遷昭文館學士知太史院事明年啓 皇太子旨以諭德臣李謙撰曆議二十一年以左侍儀奉御臣阿剌渾薩理

遷集賢學士尋遷大學士並兼太史院事遂以二十三年春同進曆經屬共二十一卷仍以餘書未成者奏以臣桓與其議若曆經曆式等序若表漏儀象等銘臣桓既冒言矣又拜手稽首原立院之初序而銘曰

天鑑下民亂靡有定孰能一之聖哲受命

太祖神武始開乾坤初業垂法以貽後昆續緒紹功剗除妖昏逮今 聖皇天錫勇智內修法度人

遣將帥伐臯弔民罔越厥志炎方歸命救其塗至武功告成萬國來萃同軌同文重譯奉贄小大悉

臣師旅以寧思與萬方永保太平黎民定居蕃息生生爲衣而蠶爲食而耕士勸其賢工勸其能關阨夜開商旅通行民雖克勤罔適天宜匡之翼之以煩 聖思乃立太史法導黎義欽若天道敬授民時教其動作時種時穫教其趨向是宜是吉五禮之舉選時爲日代卜代筮不勞龜策期措斯民康壽之域民祝 聖皇眉壽萬年民祝 聖皇五福駢臻民祝 聖皇億兆子孫七政順軌陰陽調均時雨時暘化育秋春蕩蕩巍巍盛德何言天覆地載太平無垠

瓶城齋銘

為淮東憲司知事凌德庸作

閻復

利慾之兵或墮吾城蹂厲之機或發吾瓶墨其守
不若脩仁義之干櫓金其緘不若駕聖賢之說鈴
若然則城何懼於脫肩瓶何患乎達甕哉

王孝女旌門銘

劉因

女家容城西以毋喪感念遂不嫁終身州上其行
御史按實禮部令旌表之內翰盧公署其門曰孝
女王氏縣人劉因銘曰

孰不娶終身曰魯山之元道州之陽史名卓行何
謂非平常二子且然女奚責望盧公表之何用以

戒荒

訥齋銘

吳澂

君子之訥不盡其有餘小人之訥將言而囁嚅得
善敏於行近仁者歟是為君子儒非小人儒

蘇氏藏書室銘

袁桶

六學鴻烈代天昭明精思纂微辭以立誠匪事於
言不文奚宣折理日繁直致衍傳謂默足以通絕
其知聞敬焉孰持道焉孰存趙郡氏蘇崇其書楹
剖決雲章經緯有程靈根湛虛服習粹精廣以觀
萬約以守一迎之莫尋倚兮不躡仰止元聖學海

彌溢

虛室銘

虞集

天地萬物寓形太虛何有非實虛則俱無有室非
虛何名虛室室有毀成而虛無成無受毀管室之
在虛無不加廓有不加室善居室者反同於虛萬
古一息

奎章閣銘

虞集

天曆二年三月吉日 天子作奎章閣萬機之暇
觀書怡神則恒御焉臣等奉勅刻銘曰
維皇穆清中正無為翼覆其具欽聖在日熙迺闡正

啓左圖右史匪資燕娛稽古之理經緯有文如日
行天爰刻貞玉垂美萬年

知許州劉侯民愛銘

字木魯

至大元年秋奉直大夫許守劉侯既終更矣郡
紳先生田浦城劉興國及舊家望族郡人之父兄
長者謀劉侯字民之政於石屬筆小子泚懇讓不
獲敢蹟侯行事譔次之大德龍集乙巳夏六月侯
下車家政斬然間無雜謁其在猷為苟有利民無
或不舉許北趾於汴南揖淮楚素號多事侯材識
精敏百務叢劇聲容舒徐刃嬰而節解吏無稽牘

獄無柅訟不尚苛猛而原不可犯自公而優入則
杜門端晏游求與籍出則賓禮先覺隆將太學校三
時既隙則帥郡屬叩校官請益經史親爲之倡繇
是郡政翕然侯澤物仁而有方耕鑿樹畜永底實
效及終三年諸軍數牧外丘陵原隰懇闢殆盡切
郊農貿穀市僧連郡豪徼糴外關擅輕重以售女
弱胥因乃立斗斛市距州治重脅糴翔價之法趨
者如歸糴雖升合以上無敢摧剝民農兩利之侯
以事出法漸弛復罷糴至杖大馭數人法復立民
頌歌之歲丙午河南諸郡饑流殍日至春穀價勃

湧首發私庾大縮價聽民糴募富民粟數萬鱗出
糴市慮糴有不均也於諸社責其長日閱數賦與
之夏雨戕麥得請出郡廩積年鼠耗穀米薄價紓
民春夏徂秋無凋瘵者明年荐饑羸孳狼戾請省
出公緡賑之民爲蘇中統抵大德凡所立有司法
程討閱簿書彙帙度實而據守不跲故勇於極民
而善禦其害省大核屯田臨穎鄧艾口民稻田三
百頃人有說省曰此古屯也可復築之下侯按實
之侯按至元中司農研水利拓民業隆平生息之
道也業此皆三四十年暴取之民措何地省不臆

以兵民恫疾之狀迭陳不可卒止宣徽歲遣使征
羊馬法三十取一至則肆害取人莫誰何度其至
令縣民大書其法於堊壁患遂止程約五縣繇賦
齊均凡出錢縣官市物民間曰私買民產所有猶
未易供無之則估百倍賦官郡縣苦督責無敢拒
貪肆者亦陰幸漁獵雖瘡痍其民不恤侯深患之
土有均賦之苟無之抗簡覆陳不允不止鄆陵扶
溝產紅藍碎不時買萬鉅時其地年歉而藍霧良
大驚蹙是省以侯敏幹略趣買之相其故力請罷之
是不獨仁於許又有以仁其隣也省檄論囚荆而

時荆楚大水民飢歸請撤禁山澤以活危墊省移
中書如請民濟於阨是其澤不獨囿於近又有以
及其遠也其聽訟明察而果哀矜惻怛未始不行
其間襄城南距湛河與葉交壤葉民之鹽取解池
齊鹽止襄舊樹石河之南墾鑄以畫鹽之法葉令
妄徙而北侵襄民近百家嗾漕屬以其法酷棄之
兩縣飛狀鬪辯葉引陝漕合攻襄中以危法時侯
偕省使者會決之卒以理摧葉復石舊疆民底寧
河南先民踈土曠田價至弱雖有質鬻而契券闊
略鹵莽逮今民日生集叢蒸灌莽盡化膏沃價倍

十百閭閻滋熾叅吏蠹法孔穴禁分出至有綿曠歲
時而莫之決者侯既清白復詳聽覽而洞情僞佑
是懲非至未半歲決以百數訟爲衰民爲英女嫁
而奔人英蹟之獲他婦憚嚴其舅姑而私竄外者
寘家令妻教壻族事如其女返魂他死者歸壻不
納一男子果爭之訟不決侯行縣詰之情立出民
有以計誣罪其同行者訟縣醉亡楮緡千獄逮人
數十訊不白屢愬州至據地以慟覘色詐立屈之
決囚南陽主婦告奴醜其夫三日死榜楚極酷毒
獄久不立侯讞曰實有毒立死無少緩者簡乎獄

供有寃立貫之其聽決多此類也舊水旱禱祠祭
門羽流雜巫覡囂喙無益一不取齊袂精壹以走
群望靈貺昭答嘗春旱禱八龍井明日雨大作民
有擁香拜舞治所者人既德侯侯善使人而知所
務長社尉解僻遠爲創築近郡治使與庫傳狴犴
相連峙傲循捍衛弭患無形三皇肇立民極令天
下通祠而舊郡祠陋丕構新之崇葺廟學植檜栢
六十四本築室藏書購塑工體先賢貌影自濂溪
及紫陽朱子像而祠於學故實凡相交承則帥案
屬厚贐禮去者於侯又取豐終讓却之始終銖髮

無取及是人益信在政曄曄嶽嶽風紀屢倚用之
軋強鋤暴在人所不敢為侯不博也將退政之日
其下龍言伏如甫至談者偉異之名聲籍籍上游諸
公多譽籍之交剡騰為第一二數士論稱奉法恤
民有古良二千石之風知言者是之侯各天字字
裕民家大名以國書生從事中書出判東平移濟
司擢知冠州遂遷許風岸斬立器度疑遠春秋方
強摠用未既加忠孝豈弟出天稟能以學濟之淵
平莫測也浦城名九疇興國名庭瑞皆仕焉而已
者聲實素著郡人望所推先郡既不忍相忘侯德

兩公倡率之人彌咨歎其公云矧既叙其詳乃撮
而詩之庸冀郡人寥邈之思辭曰

郡侯繩繩三歲逆旅孰莫我矜侯吾父母我飢以
寒燠我餽我鳴袖於家田墾在野繫我窘躓均恫
其身高以兩澤煦吾陽春惟古立學定民之命治
有本末禮樂刑政誰茂棄之謂能其官我侯至止
德馨如蘭士蒙顯顯侯教載之縉紳煌煌侯勞來
之孰匪人哉而玩侯法將雜艾之我用是勗善達
而施天下之兼寧獨吾私一郡是淹車聲麟麟民
莫侯攬有堅其礪鑄配琬琰鼎鼎其來疇允侯蹟

豈予望之其末無極

安氏尊經堂銘

字木魯神

明明尊經安氏堂之用有微惕予其銘之於在古
昔挺起神聖越紹上帝昭我明命暨蒼姬氏四術
迺崇詩書禮樂順古範鎔文武道衰四教崩弛孰
其拯之天縱夫子龍馬獻圖用著著彙吉凶悔吝
開我人則二禪三繼曰帝曰王典謨訓誥明我天
常志欲有言刑於詠誥雅頌得所神人以和王綱
矢維列侯遞霸其敢僭踰筆討無赦是謂四府其
用不窮大禮大樂升降汗隆宇宙有經終古莫忒

民無能名功載人極鼎鼎儒者相與守之孰吾堯
桀相與培之曾子思孟荀董王韓周程張朱以達
聖元不息不泯皇衷民彝其有能奮立百世師安
氏東垣世以儒名味道之醇服義之精百氏謏聞
寧不有當處宜下陳經無二上至小無內至大無
外晦不加蹙顯不加泰風雨震凌幘幪是屋六籍
鳳峙疇匪雌伏安父之嗣伯仲叔季穉子齒孫繩
繩繼繼豈徒藏之斯務明之豈徒尊之斯務勤之
其徒之賢蘇伯脩甫將以所聞往相告語多岐亡
羊克敬克念無或怠墮請以銘鑑

儼思齋銘

揚剛中

理究斯明為殊為同學求斯詳疇初疇終匪心斯
圖何彰弗蒙既端爾容既肅爾躬冥凝虛遊視遺
聽空思而以斯無微不通跛倚踞歌必弛于中矯
咲躁言必墮而功戒哉無忘惟道之融

元文類卷第十七

元文類卷第十八

頌

賈侯修廟學頌

吳澂

世祖皇帝既一天下作京城於大興府之北其祖
社朝市之位經緯塗軌之制宏規遠謀前代所未
有也至元二十四年設國子監命立孔子廟暨順
德忠獻王哈刺哈孫祠

成宗始克繼先志成其事而工部郎中賈侯董其
役廟在東北緯塗之南北東經塗之東殿四阿崇
十有七仞南北五尋東西十筵者三左右翼之廣

亦如之衡達於兩廡兩廡自北而南七十步中門
崇九仞有四尺脩半之廣十有一步門東門西之
廡各廣五十有二步外門左右爲齋宿之室以間
計各十有五神厨神庫南直殿之左右翼以間計
各七殿而廡廡而門外至於外門內至於厨庫凡
四百七十有八楹肇謀於大德三年之春訖功於
大德十年之秋于時設官教國子已二十年矣寄
寓官舍不正其名丞相以爲未稱興崇文教之實
也乃營國學於廟之西中之堂爲監前以公聚後
以燕處旁有東西夾夾之東西各一堂以居博士

東堂之東西堂之西有室東室之東西室之西有
庫庫之前爲六館東西嚮以居弟子負一館七室
助教居中以莅之館南而東而西爲兩塾以屬于
門屋四周通百間踰年而成不獨聖師之宮巍然
爲天下之極而首善之學亦偉然聳天下之望遠
邇來觀靡不驚駭嘆羨其高壯宏敞蓋微丞相其
孰能贊承 聖天子之德意而微賈侯亦孰能闡張
賢宰相之盛心哉侯之董役也晨夕督視不避風
雨寒暑措置分畫一一心計指授工師莫能違焉
陞本部侍郎又陞本部尚書出領他處營造事身

雖在外心未能忘朝學也至大二年還朝拜戶部尚書首詣廟學環匝顧瞻如其家然嗚呼世之居官者大率簿書期會刀筆筐篋是務知政治之有原名教之可宗者幾何人哉人咸以爲迂而侯奉奉汲汲惟恐或後蓋其資識卓矣侯少時爲憲府屬憲長誣其副柄國者仇正直欲置之死數十人皆將連坐證左迫於拷掠悉附和以成其誣侯與在數中獨守正不阿徇淹繫三載卒不變接受誣著籍是得脫自戶部尚書而參議省事也會有羅織之獄侯議詳讞大忤時宰幾與同罪賴赦解以

免嗚呼侯之爲人如此宜其於聖道儒術深有契也非資識之過人而能之乎侯每以范文正期國學諸生激聞而愧輒面赤汗下夫文正之爲文正無他亦曰先天下之憂而憂後天下之樂而樂耳嗚呼安得人人不負侯之所期者哉侯名馴字致道濟南鄒平人將歸其鄉故著侯之所以有績於廟學者爲頌至大四年三月朔國子監丞吳澂叙詩曰於赫皇元澤彌八埏謂異翼京師風化攸先孔道曷明千古日月帝曰廟之以對光烈顯允扈臣欽輔神孫祖訓是承往一聖是遵相謂而馴而職而職乃

基乃構乃塲乃璧侯祇相言弗懈以虔新宮巍巍有
倬其騫宮墻之西學官爰作我宏爾居爾懋爾學
爾士來游四方具瞻爾則匪遙像貌聿嚴恂恂賈
侯克敦克敏執挫其廉孰混其畛一正不阿百折
不回族斯糾紛郭之恢恢廟學之崇 天子之德
丞相之功賈侯之力 右十章章四句

青宮受寶頌

虞集

天曆二年六月己酉 皇太子受寶於行幄臣等
拜手稽首而言曰臣聞古之所謂能以天下讓者
審幾於先事謂之至德既勸而庸異謂之予賢是

皆人道之常而未若今日之盛者也我 皇太子
以仁文之資知勇之德當撥亂反正以續 祖宗
之統則躬當大難嬰犯霜露而不辭及功成治定
既膺歷服之歸則推奉 聖兄謙居儲貳而不伐
剛明之斷堅於金石而無變素定之誠質諸天地
而無疑求仁得仁若處固有樂道忘勢訢然無爲
此實帝王之所難能言昔之所未有而卓然特見
於前後千萬世之內者也臣嘗讀周易而觀於乾
龍之象自潛至躍時升位異九五天飛中正極矣
益進而上庸知退夫而仲尼之贊上九曰唯聖人

知進退之正言非聖人不能及此噫仲尼發此義
於千五百年之前而昉見其事於 聖代宗社生
靈萬世無疆之福也於乎盛哉臣等幸以文學得
備延閣之顧問親逢盛禮爰敢作頌以獻頌曰
於穆 皇儲文武聖明於赫 大帝受命輯成天
運日行既明既健神交意孚曾是修遠 帝載龍
旂其行遲遲萬民俟來 皇儲有思載思載瞻于
廬于旅式好在原莫敢寧處風雨孔時道無游塵
肅肅鑾車通宵及晨 帝曰勞止毋趣行邁會言
近止交喜更慨灤陽之京 世皇所營我母即安

次于郊坰坰有豐草雨露既溼差坰于牧繁纓濯
濯 皇儲攸止百靈具扶群臣受詔奉寶來趨維
時范金龍光上燭匪舊以新景命攸屬寶來自南
追琢有章卿雲隨之五色景芒有親有尊有友有
愛以承 武皇聖孝斯在古人有言兄弟家邦咨
爾臣庶於乎勿忘史臣作頌丕昭盛德既壽以昌
子孫千億

駐驛頌

繼天體道敬文仁武大昭孝皇帝即位修明
世祖皇帝隆平故事以故東平忠憲王之孫司徒

忠簡王之子拜任丞相中書至治元年詔若曰忠
憲弼我世皇功在社稷德在生民其勅詞臣即
王所有范陽采地朔南康莊碑之昭示悠久冬刻
銘既完十有二月丞相承認歲事凡犒工勞衆郡
邑無所擾饋賀無所受天子遣使牲牢之饗非
幣之禮數異禮隆不一而止父老聚觀或至感泣
明年春正月帝幸涿州至碑所重瞳凝竚顧瞻
有懷秋九月幸易州還丙午帳殿碑垣之南駐輦
御殿上顧丞相若曰汝祖考之績之盛世載
帝室維朕不忘亦惟汝之賢有以相朕益懋世德

故也丞相頓首謝翌日既旦大官饌已上步自
帳殿御金椅座碑右丞相稱觴獻萬歲壽從臣以
次進觴天顏和怡甚久迺去丞相諭紳曰
皇上眷我祖考至此不刻以至則未有以稱汝其
銘之紳祗栗奉命用敢叙曰

太祖皇帝開創大業忠宣王孔溫窟哇太師魯國
忠武王木華黎佐佑神謨拓定疆宇繼世國王皆
著大功忠憲王繇國王世曾年十有八歲然以鉅
德大人相世廟統六合舉百度底雍熙仁覆天
下以垂大猷以迪來哲皇上念垂統之艱難守

成之不易懷往烈慰股肱聖度淵深非一介臣能
闕萬一敢即所聞見以獻頌曰
赫赫聖明嗣大寶位
祖武斯繩昭我皇制
既
想先正孰佐我家奄奠八紘帝業以華昔我
太祖疆理萬國忠宣忠武功高輔翼雷兩方屯忠
武汛掃華夏之民國王蔭葆巍巍
世皇幅員既
同弼成治隆忠憲之功奕奕中忠憲虎變莫測年未
及冠烜著明烈端冕正笏不動也聲雋傑在職儒
碩在廷何昧不昭何墜不舉何絕不紹何遠不睹
二十年間再秉鈞軸天極地蟠孰匪亭毒三元始

終維外人心大率齟齬童統慕至今天日清明終古
莫勝柱石廟廊宗社永賴相國今誰忠憲胤嗣民
之望之忠憲是繼克繼克庸滋益光大一以至公
熙我天載
帝謂侍臣丞相之賢家世所因其勅
詞垣于忠憲勛大侈以文配來河山以竦見聞涿
鹿范陽王有采食山川蒼蒼北拱
帝極蛟螭盤
擎大鼇負之德音不廟神訶護之六龍翱翔馭日
霄漢再狩郊垆目比銘篆淵鑑昭回駐驛永懷廓
清煙霾以齊九垓從臣焜煌千乘萬騎能不激昂
以勵忠義世世夔契生此德門君臣道合豈徒示

恩忠憲來雲源源裔商臣頌茲刊不告無既
馮侯去思頌

皇帝即位之明年詔地官攷輿地圖舉天下縣邑
民數之繁者陞爲州置賢守臣以幸百姓於是越
之諸暨實得今馮侯翼越在漢爲會稽郡其民剽
輕漢嘗以貴近臣爲之守猶或不振輒報聞罷自
唐以來越爲雄藩諸暨爲劇縣尤號難治侯始至
州訪民疾苦知姦猾爲民害由是嚴爲之禁里社
長有藏匿者同其罪姦猾望風引避民賴以安鄉
胥舞文虛增稅石民以抑納爲苦侯洞察其姦令

民得自陳訴積年弊欺一旦盡去先是吏卒旁午
田里無虛日侯至悉禁戢之亦無廢事有以私謁
莫夜禱于侯者侯輒斥去之邦之士喑喑稱廉侯
聞笑曰廉士大夫常分也廉恥道喪久矣吾豈詭
衆哉吾求以不負吾所學耳凡豪強撓法者必痛
加摧抑無少假借既不逞則群怨之侯不爲動郡
政之暇輒引諸生講習經史州吏環聽之凜凜乎
有富而教之之意會行省以浙西某路荒田失實
及瀕海郡鹽法多弊檄侯往問州民數千人遮道
請畱不得請則相對涕泣如失慈父侯奉檄所至

弊衣徒步以察微隱其所以詘姦豪而伸孱懦者甚於爲州嗚呼若馮侯者求之古循吏殆未見其比也或曰班固序漢循吏五人而龔黃爲之最如龔黃者獨不可爲侯比乎僕應之曰漢循吏易能也馮侯未易能也漢郡地方千里太守秩二千石考最者輒入爲九卿次不失爲三輔位尊而權任專故其道易行其化易成而其事可勉而至也今自州而上有會府有部刺史方伯連率而知州官五品秩不滿五百石制其權而撓其政者非一獨馮侯毅然不爲利疚不爲勢訕斷於必行其志然

則龔黃爲馮侯之所易馮侯爲龔黃之所難烏可比哉衆皆譁然稱善則相率請爲文以頌侯德頌曰叢爾暨陽附庸於越生齒滋衆在今爲劇 帝披輿圖命陟而州擇賢守臣得今馮侯侯自西來羸馬弊衣邦人還觀且喜且疑侯始爲政循循于于惟姦是屏惟習是扶罔俾苞苴累我名節爾冰雖清我行惟潔堂堂乾如侯幾人天實遺侯惠我邦民邦民懽呼更相告語始疑今信侯我父母昔侯未來骨肉流亡侯既來止爾農爾商 帝憫下人病于苻飢水利田功乃懋乃同 帝曰咨汝往

貳其政侯拜稽首臣翼唯命我民有言侯毋疾驅
天子有詔侯不敷徐世無陽秋孰祀侯德百世不
礪視我茲刻

贊

魯齋先生畫像贊

王磐

氣和而志剛外圓而內方隨時屈伸與道翱翔或
躬耕太行之麓或判事中書之堂布褐蓬茅不爲
荒涼珪組軒冕不爲輝光虛舟江湖晴雲卷舒上
友千古誰與爲徒管紉安王彥方元魯山陽道州
蓋異世而同符者也

書畫像自警

劉因

所以承先世之統者如是其孤所以當衆人之望
者如是其虛嗚呼危乎不有以持之其何以居

王允中贊

劉因

齒未老鬢胡爲而白耶隱然含四海之憂鬢雖衰
顏胡爲而壯耶凜然橫千仞之秋竹石丹心砥柱
中流百折而必東寸折而不柔其履危犯險幾禍
一身然視循默苟容貽害當世者不優耶

贊齋贊

蕭爽

國子助教杯君子京以贊名齋自爲記且銘之一

時宗工秀人題詠盡其義矣齋人蕭軒撥其遺而
為贊曰

上古聖神仰觀俯察旁及鳥獸取象維八書契干
戈登降控揚化成之具於焉以茁巍乎煥乎重華
位陟文命誕敷懋昭大德視民如傷于湯有光姪
情孔思謨訓洋洋經緯三極時維至文世變風移
覆其質云世之謂文古所無有游夏言行昭昭可
考締章繪句錦心繡口充棟汗牛世用曷取敵天
之明室入之靈繇政迄廣既斯以成卓哉祁君矜
世之病質以自居求盡其性如彼流泉載浚厥源

彼華紋實載殖厥根如貴尚白循循勿勿立德立
言成已成物

晦庵先生畫像贊

吳澂

理義密微蠶絲牛毛心曾恢廓海闊天高豪傑之
才聖賢之學景星慶雲泰山喬岳

臨川野老自贊

吳澂

身形瘦削春林獨鶴眼睛閃爍秋霄一鷄遠絕塵
滓大同寥廓自鳴自和自歌自樂

李奉公畫像贊

程鉅夫

歷觀宰輔久無儒者潛龍羽翼公乃大雅帝曰

舊學汝遂相予貞儒之效此其權與熙運方開明
良起喜如龍如雲如魚如水任以天下可謂大臣
勞謙得士清靜寧民想其風采金玉珪璧賜之畫
圖式是百辟豈惟丹青盛德形容尚友凌煙黃閣
清風

臨川吳先生畫像贊

虞集

業廣而精德周而尊釐析群言以究斯文章甫玄
端書冊左右豈弟君子天錫眉壽

西夏相幹公畫像贊

虞集

公姓幹氏其先靈武人從夏主遷興州世掌夏國

史公諱道沖字宗聖八歲以尚書中童子舉長通
五經爲著漢教授譯論語註別作解義廿卷曰論
語小義又作周易卜筮斷以其國字書之行於國
中至今存焉官至其國之中書宰相而歿夏人嘗
尊孔子爲至聖文宣帝是以畫公象列諸從祀其
國郡縣之學率是行之夏亡郡縣廢於兵廟學盡
壞獨甘州僅存其迹興州有帝廟門榜及夏主靈
芝歌石刻涼州有殿及廡至元間公之曾孫雲南
廉訪使道明奉詔使過涼州見殿廡有公從祀遺
象欷歔流涕不能去來二人摹而藏諸家延祐間

荆王修廟學盡撤其舊而新之所象亡矣廉訪之
孫奎章閣典籤王倫都嘗以禮記舉進士從予成
均於閣下又爲僚焉間來告曰昔故國崇尚文治
先中書與有功焉國中從祀廟學之象僅存於兵
火之餘而泯隊於今日不亦悲夫先世至元所摹
象固無恙也願有述焉以貽我後之人乃爲錄其
事而述贊曰

西夏之盛禮事孔子極其尊親以帝廟祀乃有儒
臣早究典謨通經同文教其國都遂相其君作聖
施采顧詹學官遺象斯在國廢時遠人鮮克知懷

宮改作不聞金絲不忘其親在賢孫子載圖丹青
取徵良史

自贊畫像

虞集

邈乎千載之下而謂古今一時也眇乎五尺之軀
而謂天地一體也廓乎不自知其所知也歆乎未
能至其所至也俛乎若憂非有傷乎其內也泊乎
若休無所待乎其外也服今人之服食今人之食
同乎今之人聊以順吾際也讀古人之書頌古人
之詩思夫古之人不知老之至也

大象圖贊

虞集

皇帝畫大象圖賜皇太子監察御史前典寶少監
臣某承命裝潢而寶藏之翰林直學士臣集再拜
稽首而作贊曰有偉馴象真自南域偉革鏤錫路
車是服維皇在輿游目於式任重持安賦力知
德無聞以思寫之凡格天章龍文臻妙造極嗟爾
微勞尚軼宸臆師武臣能有不察識若稽包犧受
圖布畫遠取不遺以咨神易擬茲形容克配古昔
臣用述贊與世作則

橐佗圖贊

虞集

皇武肇迹宛宛龍漠不居其康輯乘爲郭有服維

佗礪肉戴嶠毳旃帷房條輓輦軻軻千里載泉
于橐黃頭羔裘騎引顧却人習見聞聖獨有作
深宮穆清思詔勒佶手著厥初伊勞匪樂公劉績
稷于邦式廓裏糧啓行致祚八百史臣作雅稽古
允若

靜修劉先生畫像贊

歐陽玄

微黠之狂而有沂上風雲之樂資由之勇而無比
鄙鼓瑟之聲於裕皇之仁而見不可留之四皓以
世祖之略而過不能致之兩生烏虜麒麟鳳皇固
宇內之不常有也然而一見而六典作一出而春

秩成則其志不欲遺世而獨往也明矣亦將從周公孔子之後為往聖繼絕學為來世開太平者耶
默庵安先生畫像贊 歐陽玄

寤寐乎明善誠身之書步趨乎裕物致知之學關西三鱷未必榮於教授之四世荀陵八龍奚以過於伯仲之一壑豈非白茅重而忠信著玄酒醇而嗜慾薄者乎鍾期伯牙有同世而不相遇者吾故於默庵之神交而益以重容城之先覺也

威如蘇先生畫像贊

歐陽玄

英英紫芝皎皎素絲冥搜遠討默識近思子雲精

深李海孝友德人之容君子之守

郎中蘇公畫像贊

歐陽玄

維子寧父為名鄉士其心塞淵如古君子既合於古詎諧於時職是正直弗究厥施居家嗃嗃在國諤諤屹如長松矯如一鷲蚤以謹言屢忤權相晚著惠愛足食邊饑剛者必仁仁必有後宜爾有子簡自造秀遺像儼然不亡者存九原可作孰敢吏雲

潘雲谷墨贊

李泂

徠松雲貯玄谷道人屋中抱其獨琅琅空山萬

杵熟道人曄然開電目松雲化石石化玉崢嶸寶
氣星漢燭貢之奎章月在積龍光淋漓九宇福

李節婦馮靜君贊

王士熙

古之稱節婦人者不特織紵組紃而已良人不夭
未亡殆存出生氣于寒灰之中死者得爰生者已
傳其家嗚嗚馮氏百世猶夸

元文類卷十八

元文類卷第十九

碑文

國子學先聖廟碑

程鉅夫

皇慶二年春

皇帝若曰我元胤百聖之統建萬民之極誕受厥
命作之君師

世祖混一區宇亟脩文教

成宗建廟學

武宗追尊孔子所以崇化育材也朕纂丕圖監前
人成憲期底于治可樹碑於廟訶臣文之臣鉅夫
拜手稽首奉詔言曰臣聞邃古之初惟民生厚風

氣漸靡聖人憂之越有庠序學校之制天下之治
胥此焉出中統二年以儒臣許衡為國子祭酒選
朝臣子弟充弟子員至元四年作都城畫地宮城
之東為廟學基廿四年備置監學官元貞元年詔
立先聖廟久未集大德三年春丞相臣哈剌哈孫
答刺罕大懼無以祇德意乃身任之飭五材鳩衆
工責成工部郎中臣賈馴心計指授晨夕匪懈工
師用勸十年秋廟成謀樹國子學御史臺臣復以
為請制可至大元年冬學成廟度地頃之半殿四
阿崇尺六十有五廣倍之深視崇之尺加十焉配

享有位從祀有列重門脩廊齋廬庀庫為楹四百
七十有八學在廟西地遜於廟者十之二中國子
監東西六館自堂祖門環列鱗比通教養之區為
間百六十有七制加孔子大成之號祠以太牢贊
釋奠雅樂江南復戶四十隸之春秋二祀先期必
命大臣攝事皇帝御極陞先儒周敦頤程顥程頤
司馬光張載邵雍朱熹張栻呂祖謙許衡從祀庶
弟子員三百進庶民子弟之俊秀相觀而善業精
行成者歲舉從政又詔天下三歲一大比興賢能
於是崇宇陞陞陳器服冕聖師巍然如在其上教

有業息有居親師樂友諸生各安其學咸曰大哉
天子之仁至哉相臣之賢工曹之勤其知政治之
本原矣臣竊謂天地至神非風雨霜露罔成其功
斯道至大非聖君賢相罔致其化人性至善非詩
書禮樂罔就其器列聖相承謂天下可以武定不
可以武治所以尊夫子建群雍復科舉誠欲人人
被服儒行為天下國家用耳然則黎民於變時雍
顧不在茲乎於戲隆哉臣鉅夫謹拜手稽首而獻
頌曰

皇元受命誕惟作京以撫萬邦既訖武功載脩文

教登其俊良於穆宣聖垂範圍極首尊而彰曰爾
胄子弗典于學曷風四方學以聚之廩之餘之日
就月將大德嗣服迺建孔廟迺經辟雍考制程財
審時相宜適成厥功辟雍洋洋冕服皇皇羣士景
從聖道既明渙號既加我皇御天執道之中軌物
牖民翼翼乾乾帝學益弘庶政惟和我化用宣躋
祀儒師賓興羣材丕紹厥先相古盛時訏謨遠猶
罔不由賡天錫皇祖神聖文武以有萬國威何不
加令何不行何求不獲惟學是務惟材是育下民
允迪越厥左右咸有一德以厘乃辟維帝時憲惟

臣克念濟濟茂碩禮明樂備永作神主播頌無斁

曲阜孔子廟碑

復

聖上嗣服之初述祖考之成訓興學養士嚴祀先聖自曲阜始制詔若曰孔子之道垂憲萬世有國家者所當崇奉中外聞之咸曰大哉王言祇自太平文明之治粵明年元貞改元先聖五十三代孫密州尹治入朝璽書錫命中議大夫襲封衍聖公月俸百千秩視四品孔氏世爵弗傳者久至是乃復申命有司制考辟雍作廟於京師由是四方嚮風崇建廟學惟恐居後闕里祠宇燬于金季之

亂閣號奎文若大中門闕存者無幾右轄嚴公忠齊保魯嘗假清臺頒曆錢佐營膳之費歲戊申始復鄆國後寢以寓先聖顏孟十哲像至元丁卯衍聖公治尹曲阜主祀事將圖起廢奎文杏壇齋廳饗舍即其舊而新之禮殿則未遑也國初封建宗室盡濟兗單三州爲魯國大長公主附馬濟寧王分地置濟寧總管府屬縣十六曲阜其一也濟寧守臣按檀不華恭承詔旨會府尹僚佐鄉長者謀曰方今

聖天子守成尚文此鄉威化之源禮義之所從出爲

守臣者敢不對敷休命以廟役爲任首出泉幣萬緡衆翕然助之傭工顧方市木於河輦石於山掄材於野采棟橧楹礎之屬悉具又得泗水渠堰積石數百石堊稱是露階鈿砌咸足用焉郡政之暇躬爲督視甄陶鍛冶丹雘髹漆以至工師廩積各有司存經始於大德二年之春屬歲侵中止歲事於五年之秋不期月而告成殿直聳重簷亢以層基繚以脩廊大成有門七十二賢有廡泗沂二公有位黼坐旣遷更塑鄆國像於後寢締構堅貞規模壯麗大小以楹計者百二十有六皆用以緡計

者十萬有畸落成之日遠近助祭者衣冠輻湊衆庶瞻顙千禩祖庭頓還舊觀於是衍聖公治遣其子曲阜令思誠奉表以聞且以廟碑爲請會選胄子入學擢思誠國子監丞特敕中書賜田五千畝以供塗盛復戶二十八以應洒掃仍下翰林書其事于石臣復承命踉蹌旣述興造始末竊推聖人之道與天地並聖人之祀與天地無極堯舜湯文之君不作而道在洙泗立言垂教推明堯舜湯文致治之由模範百王仁及天下後世願治之主莫不宗之廟貌相望遠乎四海聖人之道固無係於

祀禮之降殺夫尊其道而燧其祀蓋治古之恒規
王政之所先也洪惟聖元神武造邦天兵傳汴成
事方殷不志存敬先聖之祀詔求五十一代孫衍
聖公元措歸魯哀集奉常禮樂於兵燼之餘燕翼
之謀肇於此矣

世祖聖德神功文武皇帝仁霑義洽九域混同文
物煥然可觀內立國學外置郡邑學官而於先聖
之後尤所注意遴選師儒訓迪作成需賢以嗣封
爵慈志未究

皇上續而成之故自紹膺景命以敦化厲俗爲先

務至於博施濟衆敷文來遠哀矜庶獄惠鮮鰥寡
由天縱之聖見於設施皆堯舜湯文之舉揆諸聖
經之言若合符契用能張皇教本光昭先業以致
魯國臣民思樂泮水如附靈臺子來之衆至矣哉
觀文化下必世後仁之效豈特震曜一時寔宗社
無疆之福也銘曰

道之大原寔出于天天何言哉乃以聖傳傳道維
何唐虞三代儀範百王萬世永賴聖人之功與天
比降聖人之祀垂之無窮 皇元肇基撥亂右武天
兵趨汴周禮在魯烝哉世皇載整乾綱始定終綏

遂臣萬方肅肅魯庭嗣封有興德音孔昭聖謨丕
顯王者之作必世後仁繼序不忘成於孝孫通觀
厥成是訓是則思樂泮水作廟翼翼如天斯棘如
暈斯飛邊豆靜嘉陟降有儀祀事孔嚴世爵以延
汎掃有戶粢盛有田聖政聿新希蹤治古僉曰皇
明登三成五泰山巖巖聖化綿綿與國無疆於萬
斯年

襄陽廟學碑

姚燧

聖元爲制凡士其名而儒其服不糅之民而殊其籍
惟青田租商征自外身庸戶調皆復之無有所與

者將百年於此矣

世祖詔即闕里聚孔顏孟三族置官而教之以
俟其成德達才者垂三紀焉是昔無聞歷古而獨
見之今者也陛下恢前皇之遠猷學厥未脩之
典封衍聖公屢下明詔還正貢莊學田俾完廟養
老資廩師生其於世聖人之胄學聖人之徒覆毓
漸濡德澤正矣府州縣邑爲之牧守令長者率以
作新廟學爲政務先而恐風行聖化之後也襄陽
宋之鄙城也金社既墟甯歸吾元帥於忽棄不戍
故宋切築爲北門殆四十年

世祖徵兵天下不忍徵利一旦以闔吾民包峴漢
而城之視猶圈虎待其自斃五年迺下則其受大
兵也爲冢又城門闕矣廟學前大闕師武臣因陋
就簡而爲之不稱神居勢宜改爲田之在郊籍旣
失存民亦廢耕主吏去之無有知其在不致視
江南他州之有夙儲者其施力又若甚艱此前政
所以苟於其事者惟總管陳衍經度之已而受更
今總管陳義謀之吏民曰明詔如是吾方表曰募
民覲獲何時明日使是學媿德他州則二千石爲
不職且受譴矣不衆爲之就緒無日吏此者割若

俸戶此者捐若財應者謹然辭出若一帥守兵家
亦勸赴功猶不足用取餘公帑治之二年聖哲中
殿賢儒傍序門堂齋庖楹礎林立朔望春秋奠薦
講肄籩豆鐘鼓有踐與節人之戾止新視易聽起所
墮習而祇是矣燧嘗過矣拜其下庭猶有可憾焉
者自唐開天配食顏子拔曾子於諸子以足十哲
前宋則躋孟子與顏氏並雖金百年未之或改後宋
則益次曾子子思進子張於曾子之舊故江之南
位十哲上亞聖人者四焉宋平北方學者安顏孟
而異曾思游憲首請黜之當國之臣不然之也其

後一侯爲憲河南是化襄陽未入山南猶其所莅
也不請而遂黜之由是是廟配止顏孟自今以觀
顏曾之於夫子同見而知伯魚前死則子思亦見
而知者惟孟子後百有餘歲爲聞而知子思學曾子
孟子學子思而得其道統之傳則曾思之功果不
優於孟氏乎顏氏前死有聖人者存未嘗爲書質
之於經事十九見贊夫子者纔一問仁與爲邦二
焉一以修己一以治人他皆見稱於夫子與不待
爲問而自謂之者也曾子述孝經大學子思作中
庸孟子則自著七篇之書學者賴之至今爲

書三子二子獨見黜是外其師而弟子是
尊於聞而知者仍祀不變而顧後所見而知者
焉或曰子記汴學已譏立顏路曾哲伯魚於
亭而坐三子堂上今何云然燧曰嚮所
疑者以崇子而抑父弟安順於倫理非曰可併去
之也今江南已配享者可不講而黜之則江之北有
有功曾思者可不請而配享乎燧故嘗曰人臣有
見列而上之則可若以考文公之事天子司之以
幸國家違於稽古之事雖天下學禮之臣羣然議
之必得所當義者而後可也侯龔石求銘奉議大

夫山南江北道肅政廉訪副使馬公昫實分刺是郡亦以俟嘗歎宜若可言燧曰嗚呼是豈可易爲哉孟子稱智足以知聖人者宰我子貢有若子貢有若則以爲自生民以來未有宰我則以爲賢堯舜遠猶未曉言聖人之所以然孔子語堯曰蕩蕩乎民無能焉則夫堯舜者益難名矣然自孔子沒訖漢之世將八百年廟焉而不碑其見之金石者孝桓元嘉許魯相瑛置百石吏領禮器與孝靈元興魯相晨奏依社稷出穀王家供禋祀二詔魏曹植始碑之唐則作廟一州必碑竅盛以衆就

其善言者韓愈氏處州柳宗元柳州道州曰自天子至于郡邑通祀遍天下惟社稷與孔子又曰仲尼之道與王化遠邇二帝三王無以侔大不敢一言以贊其道無他蓋聖人之道天也善言者繪工也於山水鳥獸草木之爲物與人執事或可圖而肖之以語繪天設色而得其髣髴萬一者古今人無能爲者也故惟著其始媮而今完者以告夫後之人銘曰夫一帝一帝書文煇煇始創於聖人而畫維襄形勢始終一地視時也身而爲險易昔焉畫守負而江山動天下兵五稔悖頑時匪無學士曰

介冑以扞大刑違事俎豆皇輿既邈壇南海涯顧
爲土中襟帶安施猶爲名城于漢之城惟廟弊軋
不稱瞻式 帝奮文教誕誥優優乎學湏才如獲
仰稷是邦承流其陳兩侯衍也經畫義遠成績桓
桓新宮實教所基嗟哉襄士挑達何爲聖人遺言
具在方冊口誦心惟奚異親炙朝趨斯庭夕休斯
庭亦奚以間闕里即居行見接武賓興成德作之
君師實 帝之力刻詩麗牲用示無極

大興府學孔子廟碑

馬祖常

昔我 太祖皇帝受命造邦金人孫于汴曰自天

太祖即以全燕開大藩府制臨中夏維時已有定
都之志矣故

太宗皇帝首詔國子通華言乃俾貴臣子第十八
人先入就學城新剏于兵學官攝於老氏之徒迨
世祖皇帝教命下始正儒師復學官廟事孔子歸
壻垣四侵地勒石具文作新士子至元二十四年
既城今都立國子學位於國左又因故廟爲京學
京師雜五方俗尹治日不給廟之墻屋弊壞將壓
以毀講席之堂粗完泰定三年今大尹曹侯上視
廟貌祠位皆不如制割稍入爲寮案倡然後大家

富人合貨以聚財者有焉釋子方士分食以充徒
者有焉施施于于咸樂相成延兩廡五十有二楹
締構塗飾工良物辦象從祀諸賢百有五人受靈
惟肖威儀有容又懇請于朝得廩餼弟子負百人
受學于師復其身不勞以事於是天下首善之教
興焉廟肇自唐咸通中至遼金燕爲都邑故嘗用
天子學制選舉升造與南國角立亦一時之盛也
太宗皇帝當雲雷經綸之世聖訓諄切以德賞貽
父師以積楚懲子弟飢焉粟肉渴焉酒醴力焉僕
使恩義其備其養賢勸善之誠固已高出於百五

之上矣

世祖皇帝立極作則人文昭明登用儒臣躬親講
學故當時勲賢之裔以及宿衛之臣罔不以揖讓
俎豆之爲懿顯蒙昏庸之爲恥也而三代國學黨
序遂庠家塾之等秩然羅列於上下才學經術用
世之士踵武而出暨

仁宗皇帝賓興大比四方舉進士凡登賢書策名
禮部者京師屢倍於外郡非列聖仁涵義揉百年
之禮樂文物推而致之歟燕自虞夏爲武衛之服
召公之化尚矣昭王築臺以徠賢士鄒衍樂毅劇

辛至有稱於世韓嬰以詩易爲一家師孔穎達博綜五經卓然庶幾醇儒今多士游歌在庭摳衣在廟將見魯鄒之美矣若嬰穎達宜所不道矧衍毅辛之徒哉夫儒者之學詩書六藝之文以至施天下之道無有二也後世教不明家異人殊各溺於所習以相詆訾由上之教無以一之嗟夫古者小學大學之師弟子之傳皆本於道德仁義之實著於詩書六藝之文非有教有授則不敢以傳也傳焉而尤雜不經則上有刑也是故風淳而氣同由上之教有以一之也而王國多士逢文明之會肆

業有學學有師春秋祀其先聖先師者又有廟有位入有食以處出有貴於衆所以報稱列聖教化之德而應賢侯承宣之志者必冠而起矣提舉學事崔居中教授賈良弼正張禎祿司視以狀請曰廟之事成前尹馬思忽實能始之今尹曹偉實能終之經歷王孝祖薛讓警巡監院元都驍使李權且能考工於下也余旣爲言正充鄒沂鄒四公配食東鄉位其來請遂爲銘詩不辭詩曰

皇元有赫奄受大國于月之崑于日之域京邑翼翼莫不來極予誕敷文德新都有嗟辟雍莪莪

弁之瑳濟爾象義錡爾弦歌新宮則那舊廟如之
何 皇帝在御百度咸若海輪維禱河浮厥柏是
尋是斷虞庠嶽嶽式光我上國玄聖儀儀玄統龍
衣衍我先師既右享之采芹于池薦此明犧用介
我蕃釐蕃釐伊何彼美多士克明克類克諒厥事
以登膺仕以媚于天子有鏗華鐘路鼓逢逢言燕
于公有翼有顛多士既同天府是庸維曹侯之功
曹侯閭閭迺承迺宣御劇迺專虞庠連連王氏安
安祇國維賢 天子萬年

光州孔子新廟碑

馬祖常

光州既新作孔子廟乃以圖來徵文於州人馬祖
常曰爾先子爲政於此州州有學以教人有田以
養士有廟以事先聖先師矣今又圯不治廟四出
無垣登降無階肖象之設五采之服不彰妥靈之
位不嚴配侑之序不飾室屋榑欂周廡重門及籩
豆禮器之類一切弊舊取具假備歲春秋釋奠宮
及屬師及弟子致齋無次某等一二人辱守茲土
割其稍入合民之錢粟筏木陶瓦木材陶良以錢
庀工以粟傭力丹漆黝堊塗錮施色之物皆集作
於天曆二年七月九日成於至順元年八月十有

八日凡廟位象設稱乎南面而為王者之居昔之
不治者今皆治矣昔之無有者今皆有矣爾先子
為政於此州爾又以文名于時爾宜為文告來者
庶謹之而毋毀也祖常三為典禮之官習於先王
之禮而學於聖人之徒陳跡往轍不敢煩州人之
聽獨以我朝有道之世告吾州人始

憲宗皇帝都和寧遣國子二十人就學今都之南
城孔子廟旁旨意訓誨刻載廟中

世祖皇帝潛王邸召學士王鶚因幄中設主陳俎
豆觀祭孔子儀

武宗皇帝詔天下若曰世嘗知尊孔子矣而皆未
至也其進封至聖文宣王孔子為大成至聖文宣
王今

皇帝正位 制若曰孔子大聖推本父母未極褒
崇父叔梁紇可封啓聖王母顏氏可封啓聖王夫
人命以璽書告闕里廟庭猗歟盛哉夫天下既富
而教興焉興教必於學學必有所師師莫若聖聖
莫若孔子則廟而事之者學者宜莫先焉且既富
而教雖三王之治未有不富而能教者吾州介江
淮之交生殖甚寡然少長安於朴俗衣服飲食給

於田蠶弋釣之力工商給於粗完男女婚嫁養生
送死質而有節其人已幾於淳厚故易富而易教
弗如他州之人必待厚歲而後富近刑而後教也
是以見其州大夫賢欲有所興起於善而又應之
之速也如此詎天下以難治者豈君子哉 國家以
文化成四海考郡縣之績當以吾州為首焉茲序
其實而又繫之以詩俾州人誦新廟之成而不忘
州大夫之德也詩曰

於穆聖師降我新廟几筵維飾象設維肖四瞻周
廟載基載築雅雅鱗鱗靈御之肅靈御之肅衣裳

我人俾不為羣而即於倫埏埴萬類同仁於天匪
言莫宣匪文莫傳六藝百家咸質於經我維受之
日化於成

大帝在位翕以敷施考妣啓聖而追王之四海作
則文明式昭我州易教作廟維喬榎栴梓栢弗雕
而斲陶瓦髹漆施色丹渥麗牲在門春秋蠲吉官
屬師徒端弁以入其容鏘鏘其神洋洋曠茲顛蒙
闇而日章淮巘諸谷會流為潢南薄其邠州名為
光光在百城瘠土寡殖維人易教衣食耕織則既
衣食又學為士學士有師先聖是祠州侯德勸我

民豈忘之

真定路宣聖廟碑

字米魯翀

初鎮州置真定路以中山冀晉趙深蠡府一州五
土地人民奉我
睿宗仁聖景襄皇帝顯懿莊聖皇后湯沐首務立
學養士當是時也

世祖聖德神功文武皇帝淵潛朔庭聞鎮之學緩
未即叙龍集丁未勅有司勿怠其事於是以金粟
岡廟址崇殿廡闢舍太原元好問有記越十有
四年庚申

世皇即祚都燕統一八表置憲肅郡府鎮憲為諸
道之冠庠序闕略必憲人府人胥議興治至元暨
今雖屢加葺猶有未備至順辛未憲暨府議倡集
楮幣三萬市物傭工募役自殿之廡自廡之門新
其屋楹三十有二棟宇軒楯拱挾環合左右翔峙
作杏壇于殿之北神厨于廟之東自廟徂學門垣
控桓循序森立瓦墁締築堅麗於舊先是府尹馬
思忽已基未構而去政人遷易者十餘年尹張猛
台侔和則平治中和允升繼至憲使妥歡提其綱
賓佐韓復理其目始克有濟其年夏告成壬申春

府遣吏李明善介徵士贍思狀來請志其續聊嘗
貳憲燕南義不容讓稽宋蔡京遷學陸佃記略曰
真定雖塞北有江南之勝江南豪傑特起如臨川
王公與孟軻相上下真定初未有聞噫是何言之
恠也真定者冀州東垣堯舊封也昔帝堯以帝嚳
子侯恒山之唐自唐侯即天子位徙山之西號陶
唐氏太行東西境數千里皆帝之圻真定固神明
之宅也孔子經法於易則遯伏羲以本無言書則
始唐虞以道政事詩則乎殷周以正性情春秋則
黜五霸以嚴名分禮樂亦降以鑑寔隆天人之道

至矣迺曰惟天為大惟堯則之唐韓愈謂堯以道
傳舜禹湯文武周公孔子孟軻蓋孔氏立教如帝
典微言如三謨帝堯孔子位不同而同聖王安石
背道迷經蒙君誤國京佃傾黨滋熾世益大壞河
南程氏兄弟承先聖之緒採之終賴其言道不墜
地建安朱氏師則兩程裒輯遺言貫通折衷以悟
百世先正許文正公見其書神感明會相我
世皇同符堯舜世道人心翕然大正洙泗淵源日
月昭朗今神聖繼興世目趨治鎮股肱郡也帝堯
之恩在焉朝廷之化先焉崇事先聖所以教也鎮

士知所鄉往下學上達尊經慎藝何德不進何業
不修何邪不鏹何古不及憲牧之輔治教縉紳之
報君父於是乎在迺賦詩以慰鎮人士曰
太行之山滹池之水孰古與美陶唐之里滹池之
滸太行之所孰今與伍皇祖之土恒山嶙嶙滹水
汙汙昊天生民思堯之仁滹水湯湯恒山蒼蒼帝
堯相望於赫

世皇始鎮之府時未忘武維士與女澤沐時雨龍
德出潛萬方既瞻春熙秋嚴自北而南皇風斯角
時雍於變視彼侯甸恒鎮之先大殿周廡先聖之

宇又未今觀誰敢予侮有廟有庭有戶有扃肅肅
其凝昭昭其靈新是鎮學式對恒嶽惟士也確順
我先覺求門於牆求室於堂伊洛考亭使我不盲
惟聖之玄惟王之素園冠方履天地之度侃侃閭
閻天天申申如日之昫如躬之親既儼既翼臨汝
明德以賓皇國方州是則鎮人聚喜歸功憲紀憲
人曰止其誰敢爾顯望神京稽首奉揚配天無疆
天子之光

元文類卷第十九

天學之出

入曰山其峰嶺爾爾望軒京崇首奉物昭天無靈

爾躬心齊皇圖方民是興餘人樂善識心憲以憲

聞夫大中申以日之節收授之歸福謝也異謝也

其

其

其

其



